

曾文  
正公  
三十家詩鈔

埽葉山房發行

線  
831  
7355-2  
v. 1

舊籍



湘鄉曾國藩纂  
東湖王定安增輯

三十家詩鈔



鴛湖顧鹿署



民國六年石印



掃葉山房商標

總發行所  
上海北  
棋盤街  
掃葉山房

序

將舍今世宮室舟車之安冠裳酒饌之適權衡之輕重斗斛之大小尺度之長短事  
事蘄合乎古制則舉世駭然以爲怪迂不近人情然且狃於今世宮室舟車之安冠  
裳酒饌之適權衡之輕重斗斛之大小尺度之長短漫不知古制爲何物是猶穫者  
忘畊衣者忘織爲子孫者忘其祖父世必目爲妄庸子矣夫宮室舟車冠裳酒饌權  
衡斗斛尺度此日用所常需亘萬古而不廢者也然由今日而溯之百年以前則其  
制屢更由百年而千年而萬年雖博洽閎通之士不能詳其式然則不變者百物之  
名耳其體之屢變不已機軸日新雖善眩人弗能窮也惟詩亦然自三百篇變而騷  
賦騷賦變而漢魏之五言下逮晉宋齊梁文體爛然浮於質矣唐時乃有古今體之  
別眾製大備李白杜甫作而詩之軌極焉其他清才逸翰分道揚鑣就其善者無慮  
數十百家自生民以來詩未有如唐之盛者也昌黎生李杜後乃稍參以險詞澀字  
蘇黃起而和之抉幽搜奇而詩之變極焉夫通其變使民不倦聖人之道也而明代  
李何諸子獨黜宋元而規仿漢魏盛唐海內翕然應聲號爲中興夫以李何之才假  
使生於漢魏盛唐吾不知視曹王李杜先後何如要其汪洋恣肆固亦一時之傑也

南投縣鹿谷鄉黃瑞木堂七  
代裔孫代表黃允哲 捐贈

而世乃以剿襲字句詆詬無遺力豈非諸賢信古之過有以貽其口實哉雖然尊漢魏盛唐而抑宋元者嘉隆諸子之偏也而因嘉隆諸子遂並謂漢魏盛唐之不可輕學則又持論者之大謬也蓋宋元之詩三唐之遺三唐之詩漢魏六朝之遺自後觀之千歧萬變而不一其涂轍自前觀之則黃河萬里起於崑崙之濫觴無所爲異也余輯三十家詩鈔自曹子建訖於庾子山六代作者略具俾學者知宋元三唐之源有所自出而善學漢魏六朝者仍不可不極之三唐宋元以窮其變若專守是編模聲範字遂姝姝自喜以爲較李杜而躡蘇黃此太史公所謂以耳食者非區區謏陋所敢聞也東湖王定安鼎丞甫叙

序

三百篇尙矣爲議論所不敢及嗣五言肇興自漢魏至齊梁其間逐臣羈客內有憂傷怨苦之鬱積適激觸乎物會而形爲感歎以抒其惋戀忠悱之情然往往多爲瘦詞以變眩迷亂其本意讀者常苦之吾鄉曾文正公深憫焉因取子建嗣宗淵明康樂明遠元暉六家詩別編爲一帙間加評註詳博精審能補向來註家所未及非其精神與諸作者相憑依烏能具此神解至其輔世翼教之旨亦卽寓其中頃哲嗣劼剛徹侯屬東湖王鼎丞觀察爲校定鐔之板鼎丞夙聞文正緒論因推廣其意再取仲宣公幹安仁茂先士衡太冲景陽越石景純延年希逸宣遠惠連元長文通休文彥昇彥龍仲言叔庠子慎子堅孝穆子山二十四家詩略爲詮釋附入編末其發凡起例數百言厯品第自建安以降數十家高下得失以見流派日歧隨運會爲升降獨賴數子維持其間如人倫之有周孔俾承學之士取其詩紬繹之庶不沿於所趨有以追復元古而得風雅之正是其標揭宗旨扶植詩教至爲宏益與他選不可同年而語也同治十三年十月武陵楊彝珍敘於長沙寓館



三十家詩鈔總目

卷一

魏曹子建植五十五首

魏王仲宣粲十五首

魏劉公幹楨十二首

魏阮嗣宗籍八十二首

晉潘安仁岳十二首

晉張茂先華二十三首

晉陸士衡機六十六首

晉左太冲思十二首

晉張景陽協十二首

晉劉越石琨三首

晉郭景純璞十首

卷二

晉陶淵明潛百十五首

宋謝康樂靈運六十五首

宋顏延年延之三十首

宋謝希逸莊六首

宋謝宣遠瞻九首

宋謝法曹惠連二十六首

卷三

宋鮑明遠照百三十一首

齊謝元暉朓百十八首



齊 王元長 融 九十四首

卷四

梁 江文通 淹 百三首

梁 沈休文 約 百五十八首

梁 任彥昇 昉 十八首

梁 范彥龍 雲 三十八首

卷五

梁 何仲言 遜 百十七首

梁 吳叔庠 均 百三十四首

梁 庾子慎 肩吾 八十八首

卷六

陳 陰子堅 鏗 三十四首

陳 徐孝穆 陵 三十五首

北周 庾子山 信 二百二十六首

都一千八百四十七首

三十家詩鈔總目

三十家詩鈔凡例

五言之興濫觴蘇李古今詞人咸無異辭愚以爲西京文士託爲逐臣孤客以抒其  
惋戀之情耳未必果爲蘇李所作也玉臺新詠以蘇詩前二首爲別妻之詞然玩詩  
中樽酒贈遠人生當復來歸諸語則似其妻送子卿非子卿別妻也或又謂古人朋  
友假譬夫婦子卿諸作蓋答李陵之什然山海隔中州已在幕北俯觀江漢流忽言  
南方其非事實顯然無疑漢人作賦喜稱烏有子虛李陵蘇武亦楚太子吳客之類  
耳茲選斷自曹植紀實也

十九首綿邈質直千古絕唱而不列作者姓名或以爲枚乘傅毅之詞然遊戲宛洛  
地屬東京前人辨之詳矣茲選皆取專家十九首非一人所作故不載

曹氏父子皆號能文武帝文帝不減陳思茲選不及帝王示尊君也蕭梁諸君概從  
此例

建安諸子均一時之傑而風骨迥上陳思爲冠仲宣公幹悱惻雄傑各擅勝場茲選  
首列陳思次及王劉五言之盛於斯極矣陳吳兩應之詩流傳甚少零章斷什未能  
成帙故略焉阮嗣宗當易代之際喜爲瘦詞迷亂本意原其忠悱所寄離騷之遺也

當途之世茲爲後勁

典午一代詞人潘張陸左實倡先路然安仁茂先文過其質士衡之擬古太冲之詠史其錚錚者乎張內史劉太尉同是祖述仲宣而景陽華淨越石清拔各臻其妙郭宏農憲章黃門文體特爲彪炳遊仙之作雖違元旨而婉麗悽緊致足移人陶靖節以名臣之後守道不屈高風亮節卓絕千古其詩峻潔取逕獨超微獨當時人莫及卽漢魏以來未能或之先也鍾嶸稱爲古今隱逸詩人之宗信矣

劉宋之詩謝康樂雕鑿山水還乎自然鮑明遠模範樂府激昂悲壯二公蓋翹然特出者也顏特進鏤金錯采或傷真氣然秋胡詩五君詠清超之致有似參軍擬之謝鮑固難鼎立要亦當時之俊矣他如希逸之清宣遠之俊法曹之麗均謝氏之傑者備登諸選以志一門之盛

齊以後詩風骨卑弱已開律體惟謝元暉雋才逸姿獨高當代視大謝殆無多讓王元長腴淨有餘適警不足然在爾時已難其選故茲集錄齊代詩自元暉元長而外均不之及

蕭梁之世崇尚豔情魏晉遺規蕩然矣就中傑出者如江屯騎沈家令何水部才思

華瞻洵堪鼎足文通整飭中尚饒骨幹休文雋永中不少神味仲言婉麗中特見性情原其體製亦安仁茂先之亞也彥昇彥龍左右驂斬叔庠子慎接軫聯鑣詩道卑靡時得數子維持其閒亦雞羣之鶴也

陳詩專工琢句略其體裁但求名語陰子堅徐孝穆時譽雖隆較之江沈諸公瞠乎後矣

北朝之詩頗多清健如魏之常景温子昇齊之蕭愨顏之推諸人皆有晉宋閒風格惜乎存詩無多不足錄也庾子山以南人畱宦北周其詩不獨於北朝高樹一幟卽當時南朝諸人皆在下風時有南徐北庾之稱其實徐不逮庾遠甚故茲選以庾子山爲之殿云

或疑魏晉六朝詩人當不止於所選要其菁華則盡於是矣蓋曹氏父子思王爲優阮家叔姪步兵爲傑二陸則兄勝於弟二張則弟過於兄嵇叔夜止工四言傅休奕時多累句若夫孫子荆零雨之篇王正長朔風之句非不忼慨激昂然單章斷語未克成家又若王僧達之著名於宋陸韓卿之標美於齊梁則有邱遲劉峻虞羲徐悱柳惲之徒陳則有張正見周宏讓江總之屬究其所長無出陰何徐庾四家之右者

至如隋之楊素薛道衡王胄虞世基諸人時有名章傑句可采要亦不能越四家之範圍也是故古詩之微至陰何而極律詩之作自徐庾而開編詩訖於徐庾蓋亦有盛衰升降之感焉同治十三年甲戌七月既望東湖王定安謹識

是選分爲六卷一卷曹阮二家吾師湘鄉曾文正公原選也仲宣公幹安仁茂先等九家定安推廣文正之意而益之者也二卷陶淵明謝康樂二家文正原選也顏延年謝希逸等四家定安益之者也三卷鮑謝二家文正原選也王元長一家定安益之者也四五六卷共詩十家則皆定安所輯者也故於一二三卷之首敬著文正編纂之名而以定安名署於下四五六卷則但署定安增輯而已不敢誣也

曾文正公原選曹阮陶謝鮑謝六家閒有評注令讀者易曉也定安所輯於僻澀之處亦略加詮釋蓋做文正之意而爲之區區管測之見未審於文正之意有當否尙冀博雅君子匡其不逮定安又識

三十家詩鈔卷一目錄

曹子建五古五十五首

箜篌引

薤露行

惟漢行

鯪魚篇

吁嗟篇

豫章行二首

蒲生行浮萍篇

野田黃雀行

門有萬里客

泰山梁甫行

怨歌行

名都篇

當欲遊南山行

美女篇

白馬篇

升天行二首

五遊篇

遠遊篇

仙人篇

鬪雞篇

盤石篇

驅車篇

種葛篇

棄婦篇

公讌詩

贈徐幹

贈丁儀

贈王粲

又贈丁儀王粲

贈丁翼

贈白馬王彪七首

送應氏詩二首

三良詩

遊仙詩

雜詩六首

閨情

七哀詩

情詩

喜雨詩

七步詩

失題

王仲宣五古十五首

雜詩

雜詩四首

七哀詩三首

詠史詩

公讌詩

從軍行五首

劉公幹五古十二首

公讌詩

贈五官中郎將四首

贈徐幹

贈從弟三首

雜詩

鬪雞

射鳶

阮嗣宗五古八十二首

詠懷八十二首

潘安仁五古十二首

金谷集作詩一首

河陽縣作二首

在懷縣作二首

內顧詩二首

悼亡詩三首

哀詩

思子詩

張茂先五古二十三首

門有車馬客行

輕薄篇

遊俠篇

博陵王宮俠曲二首

遊獵篇

壯士篇

蕭史曲

上巳篇

答何劭三首

情詩五首

感婚詩

雜詩三首

擬古

招隱

陸士衡五古六十六首

日出東南隅行

挽歌三首

長歌行

君子行

從軍行

苦寒行

豫章行

長安有俠邪行

塘上行

折楊柳

飲馬長城窟行

門有車馬客行

權歌行

泰山吟

梁甫吟

婕妤怨

駕言出北闕行

君子有所思行

悲哉行

齊謳行

吳趨行二首

前緩聲歌

飲酒樂

猛虎行

贈馮文羆

於承明作與士龍

贈弟士龍

贈尚書郎顧彥先二首

贈顧交趾公貞

答張士然

贈從兄車騎

爲顧彥先贈婦二首

爲陸思遠婦作

爲周夫人贈車騎

祖道畢雍孫劉邊仲潘正叔

赴洛二首

赴洛道中作二首

吳王郎中時從梁陳作

擬古十二首

招隱詩

遨遊出西城

園葵詩二首

贈波邱令馮文羆

尸鄉亭

春詠

詠老

秋詠

左太冲五古十二首

詠史八首

招隱二首

雜詩

嬌女詩

張景陽五古十二首

詠史

雜詩十首

雜詩

劉越石五古三首

重贈盧湛

扶風歌

胡姬年十五

郭景純五古十首

遊仙詩十首

三十家詩鈔卷一目錄

三十家詩鈔卷一

湘鄉會國藩纂

東湖王定安增輯

曹子建五古五十五首

凡文選所錄者以○識之樂府詩集所錄者以△識之

△○箜篌引

樂府詩集題曰黃雀行

置酒高殿上。親友從我遊。中廚辦豐膳。烹羊宰肥牛。秦箏何慷慨。齊瑟和且柔。陽阿奏奇舞。京洛出名謳。樂飲過三爵。緩帶傾庶羞。主稱千金壽。賓奉萬年酬。久要不可忘。薄終義所尤。謙謙君子德。磬折欲何求。驚風飄白日。光景馳西流。盛時不可再。百年忽我遒。生存華屋處。零落歸山邱。先民誰不死。知命復何憂。氣勢○此篇言盛時難恃樂不可極其末

歸於知命而無憂也

△薤露行

樂府解題云曹植擬薤露行為天地國藩按薤露蒿里竝喪歌也亦謂之挽歌

天地無窮極。陰陽轉相因。人居一世間。忽若風吹塵。願得展功勤。輸力於明君。懷此王佐才。慷慨獨不羣。鱗介尊神龍。走獸宗麒麟。蟲獸猶知德。何況於士人。孔氏刪詩書。王業粲已分。騁我徑寸翰。流藻垂華芬。

△惟漢行

魏武帝薤露詩云惟漢二十世所任言下良

太極定二儀。清濁始以形。三光炤八極。天道甚著明。爲人立君長。欲以遂其生。行仁章以瑞。變故誠驕盈。神高而聽卑。報若響應聲。明主敬細微。三季嘗天經。二皇稱至化。盛哉唐虞庭。禹湯繼厥德。周亦致太平。在昔懷帝京。日昃不敢甯。濟濟在公朝。萬載馳其名。此篇下有平陵東以長短句近七古不錄

△鰕鮒篇

一曰鰕鮒篇樂府解題云曹植擬長歌行爲鰕鮒國藩按樂府解題謂長歌行者以芳華不久當努力行樂無至老大乃傷悲也此則有遠志而思立功於世者殊與長歌行不類

鰕鮒游潢潦。不知江海流。燕雀戲藩柴。安識鴻鵠遊。世士此誠明。大德固無儔。駕言登五嶽。然後小陵邱。俯觀上路。人勢利惟是謀。讐高念皇家。遠懷柔九州。撫劍而雷音。猛氣縱橫浮。汎泊徒嗷嗷。誰知壯士憂。

△吁嗟篇

選詩拾遺作瑟調飛蓬篇樂府解題云曹植擬苦寒行爲吁嗟魏志云植每欲求別見獨談及時政幸冀試用終不能得時法制待藩國峻迫

植十一年而三徙都常汲汲無歡

吁嗟此轉蓬。居世何獨然。長去本根逝。宿夜無休閒。東西經七陌。南北越九阡。卒遇回風起。吹我入雲間。自謂終天路。忽然下沈淵。驚飈接我出。故歸彼中田。當南而更北。謂東而反西。宕宕當何依。忽亡而復存。飄飄周八澤。連翩歷五山。流轉無恆處。誰

知吾苦艱願爲中林草。秋隨野火燔。糜滅豈不痛。願與根葉連。情韻

△豫章行

樂府解題云曹植擬豫章行爲窮達

窮達難豫圖。禍福信亦然。虞舜不逢堯。耕耘處中田。太公未遭文。漁釣終渭川。不見

魯孔邱。窮困陳蔡間。周公下白屋。天下稱其賢。

言賢才得知己而用之則達則福無知己而棄之則窮則禍

△其二

鴛鴦自朋親。不若比翼連。他人雖同盟。骨以天性然。周公穆康叔。管蔡則流言。子臧讓千乘。季札慕其賢。

△蒲生行浮萍篇

塘上行或以爲魏武帝所作或以爲文帝妻甄后所作歎以讒訴見棄此篇之意亦同

浮萍寄清水。隨風東西流。結髮辭嚴親。來爲君子仇。恪勤在朝夕。無端獲罪尤。在昔蒙恩惠。和樂如瑟琴。何意今摧頽。曠若商與參。茱萸自有芳。不若桂與蘭。新人雖可愛。無若故所歡。行雲有反期。君恩儻中還。慊慊仰天歎。愁心將何愬。日月不恆處。人生忽若寓。悲風來入懷。淚下如垂露。發篋造裳衣。裁縫紉與素。此下有日苦短篇丹霞蔽日行以長短句

近七古未錄

△野田黃雀行

國藩按樂府詩集此章與前筮篥引竝題曰野田黃雀行而辭意少異

高樹多悲風海水揚其波利劍不在掌結友何須多不見籬間雀見鷓自投羅羅家得雀喜少年見雀悲拔劍捐羅網黃雀得飛飛飛摩蒼天來下謝少年。

△門有萬里客

門有車馬客其客多敘市朝遷變朋舊凋落之事此門有萬里客其客自敘行役之苦

門有萬里客問君何鄉人褰裳起從之果得心所親挽裳對我泣太息前自陳本是朔方士今為吳越民行行將復行去去適西秦。

△泰山梁甫行

八方各異氣千里殊風雨劇哉邊海民寄身於草野妻子象禽獸行止依林阻柴門何蕭條狐兔翔我宇。

△怨歌行

伎錄樂府解題作古辭郭茂倩樂府作曹植

為君既不易為臣良獨難忠信事不顯乃有見疑患周公佐成王金縢功不刊推心輔王室二叔反流言待辜居東國泣涕常流連皇靈大動變震雷風且寒拔樹偃秋稼天威不可干素服開金縢感悟求其端公旦事既顯成王乃哀歎吾欲竟此曲此曲悲且長今日樂相樂別後莫相忘

子建蓋以周公自喻

△名都篇

歌錄云名都美女白馬並齊瑟行也皆以首句名篇國藩按樂府詩集日以刺時人騎射之妙游騁之樂而無憂國之心也

名都多妖女。京洛出少年。寶劍直千金。被服麗且鮮。鬪雞東郊道。走馬長楸閒。馳騁未能半。雙兔過我前。攬弓捷鳴鏑。長驅上南山。左挽因右發。一縱兩禽連。餘巧未及展。仰手接飛鳶。觀者咸稱善。眾工歸我妍。歸來宴平樂。美酒斗十千。膾鯉膾胎鰕。炮一作寒鼈炙熊蹯。鳴儔嘯匹侶。列坐竟長筵。連翩擊鞠壤。巧捷惟萬端。白日西南馳。光景不可攀。雲散還城邑。清晨復來還。氣勢

△當欲遊南山行

東海廣且深。由卑下百川。五嶽雖高大。不逆垢與塵。良木不十圍。洪條無所因。長者能博愛。天下寄其身。大匠無棄材。船車用不均。錐刀各異能。何所獨卻前。嘉善而矜愚。犬聖亦同然。仁者各壽考。四坐咸萬年。

△美女篇

美女妖且閑。採桑歧路閒。柔條紛冉冉。落葉何翩翩。攘袖見素手。皓腕約金環。頭上金爵釵。腰佩翠琅玕。明珠交玉體。珊瑚間木難。羅衣何飄颻。輕裾隨風還。顧盼遺光彩。長嘯氣若蘭。行徒用息駕。休者以忘餐。借問女安居。乃在城南端。青樓臨大路。高門結重關。容華耀朝日。誰不希令顏。媒氏何所營。玉帛不時安。佳人慕高義。求賢良

獨難眾人徒嗷嗷。安知彼所觀。盛年處房室。中夜起長歎。氣勢。美女如此容華而安於義命不輕於求遇合

△○白馬篇

白馬飾金羈。連翩西北馳。借問誰家子。幽并遊俠兒。少小去鄉邑。揚聲沙漠垂。宿昔秉良弓。楛矢何參差。按絃破左的。右發摧月支。仰手接飛猱。俯身散馬蹏。狡捷過猴猿。勇剽若豹螭。邊城多警急。胡虜數遷移。羽檄從北來。厲馬登高隄。長驅蹈匈奴。左顧陵鮮卑。棄身鋒刃端。性命安可懷。父母且不顧。何言子與妻。名編壯士籍。不得中顧私。捐軀赴國難。視死忽如歸。氣勢。此亦求自試表中之意

△升天行

樂府解題云曹植又有上仙錄與神遊五遊龍欲升天等篇皆傷人世不永俗情險艱當求神仙翱翔六合之外與飛龍仙人遠遊篇前緩聲

歌同意

乘躋追術士。遠之蓬萊山。靈液飛素波。蘭桂上參天。玄豹遊其下。翔鷗戲其顛。乘風忽登舉。彷彿見眾仙。

其二

扶桑之所出。乃在朝陽谿。中心陵蒼昊。布葉蓋天涯。日出登東幹。既夕沒西枝。願得

紆陽轡迴日使東馳。

△五遊篇

九州不足步。願得凌雲翔。逍遙八紘外。遊目歷遐荒。披我丹霞衣。襲我素霓裳。華蓋紛掩靄。六龍仰天驤。曜靈未移景。倏忽造昊蒼。閭闔啟丹扉。雙闕曜朱光。徘徊文昌殿。登陟太微堂。上帝休西櫺。羣后集東廂。帶我瓊瑤佩。漱我沆瀣漿。踟躕玩靈芝。徒倚弄華芳。王子奉仙藥。羨門進奇方。服食享遐紀。延壽保無疆。

△遠遊篇

楚詞遠遊章云悲時俗之迫阨分願輕舉而遠遊質非薄而無因兮焉託乘而上浮王逸云遠遊者屈原之所作也屈原履方直之行不容於世困於讒佞無所告訴乃思與仙人俱遊戲周歷天地無所不至焉

遠遊臨四海。俯仰觀洪波。大魚若曲陵。承浪相經過。靈鼈戴方丈。神岳儼嵯峨。仙人翔其隅。玉女戲其阿。瓊蓋可療饑。仰首吸朝霞。崑崙本吾宅。中州非我家。將歸謁東父。一舉超流沙。鼓翼舞時風。長嘯激清歌。金石固易弊。日月同光華。齊年與天地。萬乘安足多。

△仙人篇

樂府廣題云秦始皇三十六年使博士為仙真人詩遊行天下合樂人歌之曹植仙人篇曰仙人攬六著言人生如寄當養羽翼徘徊九天以從韓終王喬於天衢也齊陸瑜又有仙人攬六著篇蓋出於此

仙人攬六著對博太山隅。湘娥撫琴瑟。秦女吹笙竽。玉樽盈桂酒。河伯獻神魚。四海一何局。九州安所如。韓終與王喬。要我於天衢。萬里不足步。輕舉凌太虛。飛騰踰景雲。高風吹我軀。迴駕觀紫微。與帝合靈符。閶闔自嗟峨。雙闕萬丈餘。玉樹扶道生。白虎夾門樞。驅風遊四海。東過王母廬。俯觀五嶽間。人生如寄居。潛光養羽翼。進趣且徐徐。不見昔軒轅。升龍出鼎湖。徘徊九天下。與爾長相須。

△鬪雞篇

春秋左氏傳云季郈之雞鬪季氏介其雞郈氏爲之金距杜預云擣介子播其羽也或云以膠沙播之爲介雞鄴都故事云魏明帝太和中華鬪雞臺趙王石虎亦以芥羽漆砂鬪雞於此故曹植詩云鬪雞東郊道走馬長楸間是也

遊目極妙伎。清聽厭宮商。主人寂無爲。眾賓進樂方。長筵坐戲客。鬪雞觀間房。羣雄正翕赫。雙翅自飛揚。揮羽邀清風。悍目發朱光。觜落輕毛散。嚴距往往傷。長鳴入青雲。扇翼獨翱翔。願蒙狸膏助。常得擅此場。

△盤石篇

盤石山巔石。盤石山巔石上石字有誤當用連綿字與飄颻字對飄颻澗底蓬。我本太山人。何爲客淮東。薜

藋彌斥土。林木無分重。岸巖若崩缺。湖水何洶洶。蚌蛤被濱涯。光彩如錦虹。高彼凌雲霄。浮氣象螭龍。鯨脊若邱陵。鬢若山上松。呼吸吞船櫂。澎湃戲中鴻。方舟尋高價。珍

寶麗以通。一舉必千里。乘颶舉帆。幢經危履險阻。未知命所鍾。常恐沈黃鑪。下與鼃  
鼈同。南極蒼梧野。遊眇窮九江。中夜指參辰。欲師當定從。仰天長太息。思想懷故邦。  
乘桴何所至。吁嗟我孔公。詩意大抵言生於帝王之家。處於風波之地。常有性命之憂。

△驅車篇

驅車揮驚馬。東到奉高城。神哉彼太山。五嶽專其名。隆高貫雲霓。嵯峨出太清。周流  
二六埃。間置十二亭。上有涌醴泉。玉石揚華英。東北望吳野。西眺觀日精。魂神所繫  
屬。逝者感斯征。王者以歸天。效厥元功成。歷代無不遵。禮記有品程。探策或長短。唯  
德享利貞。封者七十帝。軒皇元獨靈。飭霞漱沆瀣。毛羽被身形。發舉蹈虛廓。徑廷升  
窈冥。同壽東父年。曠代永長生。此亦輕舉遠遊之意。

△種葛篇

種葛南山下。葛藟自成陰。與君初婚時。結髮恩義深。歡愛在枕席。夙昔同衣衾。竊慕  
棠棣篇。好樂和瑟琴。行年將晚暮。佳人懷異心。恩紀曠不接。我情遂抑沈。恩紀曠不接。謂己見  
疏於文帝猶婦。見棄於其夫也。出門當何顧。徘徊步北林。下有交頸獸。仰見雙棲禽。攀枝長歎息。淚  
下沾羅襟。良馬知我悲。延頸代我吟。昔爲同池魚。今爲商與參。往古皆歡遇。我獨困

於今棄置委天命悠悠安可任。

△棄婦篇

石榴植前庭綠葉搖縹青丹華灼烈烈璀璨有光榮光榮暍流離可以處淑靈有鳥飛來集拊翼以悲鳴悲鳴夫何為丹華實不成拊心長歎息無子當歸甯有子月經天無子若流星天月相終始流星沒無精棲遲失所宜下與瓦石并憂懷從中來歎息通雞鳴反側不能寐逍遙於前庭踟躕還入房肅肅帷幕聲寒帷更攝帶撫弦調鳴箏慷慨有餘音要妙悲且清收淚長歎息何以負神靈招搖待霜露何必春夏成晚穫為良實願君且安甯子建見疏於文帝屢遷國邑有才而不見用自嗟屏逐之臣故以棄婦自喻

○公讌詩此在鄴宮與兄不讌飲時武帝在故稱丕為公子

公子敬愛客終宴不知疲清夜遊西園飛蓋相追隨明月澄清影列宿正參差秋蘭被長坂朱華冒綠池潛魚躍清波好鳥鳴高枝神飈接丹轂輕輦隨風移飄飈放志意千古長若斯工律

○贈徐幹劉良云子建與徐幹俱不見用有怨刺之意故為此詩

驚風飄白日忽然歸西山圓景光未滿眾星燦以繁志士營世業小人亦不閑聊且

夜行遊游彼雙闕間文昌名殿鬱雲興迎風名觀高中天春鳩鳴飛棟流焱激樞軒顧念

蓬室士指貧賤誠足憐薇藿弗充虛皮褐猶不全慷慨有悲心興文自成篇寶棄怨

何人和氏有其德彈冠俟知己知己誰不然良田無晚歲膏澤多豐年亮懷璠璣美

積久德逾宣親交義在敦申章復何言情韻。和氏植自喻謂己有獻寶之責而已亦遭別也知己植自指謂徐幹俟己而已之

冠亦被傲棄也

○贈丁儀李善云與都亭侯丁翼今云儀誤也魏略曰丁儀字正禮太祖辟為掾呂向云魏志儀有文才子建贈以此詩有怨刺之意

初秋涼氣發庭樹微銷落凝霜依玉除清風飄飛閣朝雲不歸山霖雨成川澤黍稷

委疇隴農夫安所獲在貴多忘賤為恩誰能博狐白足禦冬焉念無衣客思慕延陵

子寶劍非所惜子其甯爾心親交義不薄情韻。首四句賦景物朝雲四句喻用才則民被其澤棄才則國無所獲在貴四句

譏時之貴臣不以薦賢下士為意末四句自矢不棄良友

○贈王粲

端坐苦愁思攬衣起西游樹木發春華清池激長流中有孤鴛鴦哀鳴求匹儔我願

執此鳥惜哉無輕舟欲歸忘故道顧望但懷愁悲風鳴我側義和逝不畱重陰潤萬

物何懼澤不周誰令君多念自使懷百憂情韻。鴛鴦喻粲我願二句喻己思引粲而無良會重陰句喻太祖王粲最為太祖

所重故末  
四句云爾

○又贈丁儀王粲

集云答丁敬禮王仲宣善云翼字敬禮儀誤也

從軍度函谷驅馬過西京山岑高無極涇渭揚濁清壯哉帝王居佳麗殊百城員闕

出浮雲承露概泰清皇佐揚天惠四海無交兵權家雖愛勝全國為令名君子在末

位不能歌德儀丁生怨在朝王子歡自營歡怨非貞則中和誠可經

從軍謂建安三

張魯皇佐指魏太祖權家謂兵法之權謀家也君子謂丁王也丁時為太子掾位卑故曰怨在朝王時免官在家故曰歡自營歡怨皆有所不平故勗之以中和

○贈丁翼

文士傳云翼字敬禮儀之弟也為黃門侍郎

嘉賓填城闕豐膳出中廚吾與二三子曲宴此城隅秦箏發西氣齊瑟揚東謳肴

來不虛歸觴至反無餘我豈狎異人朋友與我俱大國多良材譬海出明珠君子

義休侍小人德無儲

侍待也一曰具也儲謂蓄積之

積善有餘慶榮枯立可須酒

蕩固大節時俗多所拘君子通大道無願為世儒

○贈白馬王彪

集云於圈城作魏志云楚王彪字朱虎初封白馬王後徙封楚任城王彰字子文竝武帝子彰建安中為北中郎將伐烏丸有功文

帝黃初三年為任城王四年朝京不即得見忿怒暴薨○藝苑卮言云子建謁帝承明廬明日照高樓子桓西北有浮雲秋風蕭瑟非鄴中諸子可及仲

宣公幹遠在下風吾每至謁帝一章便數十過不可了悲婉宏壯情事理境無所不有又云陳思王贈白馬王彪詩全法大雅文王之什體以故首二章

不相承耳後人不知合而爲一者良可笑也

序曰黃初四年正月白馬王任城王與余俱朝京師會節氣到洛陽任城王薨至七月與白馬王還國後有司以二王歸蕃道路宜異宿止意每恨之蓋以大別在數日是用自剖與王辭焉憤而成篇

謁帝承明廬逝將歸舊疆

鄭城也

清晨發皇邑日夕過首陽

在洛陽城東北二十里

伊洛廣且深

欲濟川無梁汎舟越洪濤怨彼東路長顧瞻戀城闕引領情內傷

情韻

其二

太谷何寥廓山樹鬱蒼蒼霖雨泥我塗流潦浩縱橫中逵絕無軌改轍登高岡修坂

造雲日我馬玄以黃

情韻

其三

玄黃猶能進我思鬱以紆鬱紆將何念親愛在離居本圖相與偕中更不克俱鳴臬

鳴衡軌豺狼當路衢蒼蠅閒白黑讒巧令親疏欲還絕無蹊攬轡止踟躕

情韻

其四

踟躕亦何留相思無終極秋風發微涼寒蟬鳴我側原野何蕭條白日忽西匿歸鳥

赴喬林。翩翩厲羽翼。孤獸走索羣。銜草不遑食。感物傷我懷。撫心長太息。情韻

○其五

太息將何為。天命與我違。奈何念同生。一往形不歸。孤魂翔故域。靈柩寄京師。存者忽復過。亡沒身自衰。人生處一世。去若朝露晞。年在桑榆間。影響不能追。自顧非金石。咄嗟令心悲。情韻。○同生指任城王彰。桑榆以日之將落喻人之將老。影響雖捷尚不如將逝之年光。其去更速也。

○其六

心悲動我神。棄置莫復陳。丈夫志四海。萬里猶比鄰。恩愛苟不虧。在遠分日親。何必同衾幃。然後展慇懃。憂思成疾疹。無乃兒女仁。倉卒骨肉情。能不懷苦辛。情韻

○其七

苦辛何慮思。天命信可疑。虛無求列仙。松子久吾欺。變故在斯須。百年誰能持。離別永無會。執手將何時。王其愛玉體。俱享黃髮期。收淚卽長路。援筆從此辭。情韻。○言有司逼迫

太甚時。虞不測之禍。變生斯須。閒事耳。誰能保百年哉。

○送應氏詩

劉良云。送瓌瑒兄弟時。董卓遷獻帝於西京。洛陽被燒。故多言荒蕪之事。

步登北邙阪。遙望洛陽山。洛陽何寂寞。宮室盡燒焚。垣牆皆頓擗。荆棘上參天。不見

舊耆老。但覩新少年。側足無行徑。荒疇不復田。遊子久不歸。不識陌與阡。中野何蕭條。千里無人烟。念我平常居。氣結不能言。情韻

其二

清時難屢得。嘉會不可常。天地無終極。人命若朝霜。願得展燕婉。我友之朔方。親昵竝集送。置酒此河陽。中饋豈獨薄。賓飲不盡觴。愛至望苦深。豈不愧中腸。山川阻且遠。別促會日長。願為比翼鳥。施翮起高翔。情韻

三良詩

詩是

左傳云秦伯任好卒以子車氏三子奄息仲行鍼虎為殉皆秦之良也詩人作黃鳥以哀之劉良云植被文帝責黜意者自悔不從武帝而作

功名不可為。志義我所安。秦穆先下世。三臣皆自殘。生時等榮樂。既沒同憂患。誰言捐軀易。殺身誠獨難。攬涕登君墓。臨穴仰天歎。長夜何冥冥。一往不復還。黃鳥為悲鳴。哀哉傷肺肝。

遊仙詩

此亦升天行五遊篇遠遊篇仙人篇等作之旨

人生不滿百。戚戚少歡娛。意欲奮六翮。排霧凌紫虛。蟬蛻同松喬。翻蹟登鼎湖。翱翔九天上。騁轡遠行遊。東觀扶桑曜。西臨弱水流。北極玄天清。南翔陟丹邱。

○雜詩李善云此六篇並託喻傷政急朋友道絕賢人爲人竊勢別京後在鄆城思鄉而作

高臺多悲風朝日照北林之子在萬里江湖迴且深方舟安可極離思故難任孤雁

飛南遊過庭長哀吟翹思慕遠人之子遠人當有所專指之人若徐幹之類願欲託遺音形影忽不見翩

翩傷我心識度。易小過飛鳥遺之音謂欲託之寄音信於故鄉也轉瞬而雁之形影已不見矣

○其二

轉蓬離本根飄颻隨長風何意迴飈舉吹我入雲中高天上無極天路安可窮類此

游客子捐軀遠從戎毛褐不掩形薇藿常不充去去莫復道沈憂令人老識度。轉蓬游子似

皆子建以自喻者本根指京師也

○其三

西北有織婦綺縞何續紛明晨秉機杼日昃不成文太息終長夜悲嘯入青雲妾身

守空閨良人行從軍自期三年歸今已歷九春飛鳥繞樹翔噉噉鳴索羣願爲南流

景馳光見我君識度。良人我君皆喻思君之意

○其四

南國有佳人容華若桃李朝遊江北岸夕宿瀟湘沚時俗薄朱顏誰爲發皓齒俛仰

歲將暮榮耀難久恃識度。此自惜有才而不得及時見用也。

其五

僕夫早嚴駕。吾將遠行遊。遠行欲何之。吳國為我仇。將騁萬里途。東路安足由。江介

多悲風。淮泗馳急流。願欲一輕濟。惜哉無方舟。閒居非吾志。甘心赴國憂。識度。此即求自試。

表願身分蜀境首懸吳關之意

其六

飛觀百餘尺。臨牖御櫺軒。遠望周千里。朝夕見平原。烈士多悲心。小人媮自閑。國讐

亮不塞。甘心思想元。拊劍西南望。思欲赴太山。絃急悲聲發。聆我慷慨言。識度。此亦求自試。

表之意

閨情一作雜詩

攬衣出中閨。逍遙步兩楹。閒房何寂寞。綠草被階庭。空室自生風。百鳥翩南征。春思

安可忘。憂戚與我并。佳人在遠道。妾身單且瑩。歡會難再遇。芝蘭不重榮。人皆棄舊

愛。君豈若平生。寄松為女蘿。依水如浮萍。齋身奉衿帶。朝夕不墮傾。儻終顧盼恩。永

副我中情。此亦與棄婦篇相近

△七哀詩玉臺作櫟詩樂府作怨詩歌行本辭

明月照高樓。流光正徘徊。上有愁思婦。悲歎有餘哀。借問歎者誰。言是蕩子妻。君行踰十年。孤妾常獨棲。君若清路塵。妾若濁水泥。浮沈各異勢。會合何時諧。願為西南風。長逝入君懷。君懷良不開。賤妾當何依。  
情韻。國藩按樂府詩集所載又有一首。晉樂所奏凡二十八句較本辭多十二句。

○情詩玉臺作雜詩

微陰翳陽景。清風飄我衣。遊魚潛綠水。翔鳥薄天飛。眇眇客行士。遙役不得歸。始出嚴霜結。今來白露晞。遊子歎黍離。處者歌式微。慷慨對嘉賓。悽愴內傷悲。此代述久情游魚二句言得所也眇眇二句言不如魚鳥也

喜雨詩

天覆何彌廣。苞育此羣生。棄之必憔悴。惠之則滋榮。慶雲從北來。鬱述西南征。時雨中夜降。長雷周我庭。嘉種盈膏壤。登秋畢有成。

七步詩本集不載世說新語云文帝嘗令東阿王七步中作詩不成者行大法應聲便為詩七步帝有慚色

煮豆持作羹。漉豉以為汁。其向釜下然。豆在釜中泣。本是同根生。相煎何太急。

失題見藝文鶴部

雙鶴俱遨遊。相失東海旁。雄飛竄北朔。雌驚赴南湘。棄我交頸歡。離別各異方。不惜萬里道。但恐天網張。

樂府詩集有桂之樹一首長短句 當牆欲高行長短句當事君行長短句 當車已駕行長短句 妾薄命二首一六言一雜言 苦思行一首長短句 飛龍

篇一首四言 與平陵東 日苦短 丹霞蔽日行 皆以非五言古故未鈔

王仲宣五古十五首 文選錄者以○識之樂 府詩集錄者以△識之

○雜詩

日暮遊西園。冀寫憂思情。曲池揚素波。列樹敷丹榮。上有特棲鳥。懷春向我鳴。寒粧欲從之。路險不得征。徘徊不能去。伫立望爾形。風飈揚塵起。白日忽已冥。回身入空房。託夢通精誠。人欲天不違。何懼不合并。賦一作飄

雜詩

吉日簡清時。從君出西園。方軌策良馬。竝驅厲中原。北臨清漳水。西看柏楊山。回翔遊廣囿。逍遙波水閒。

其二

列車息眾駕。相伴綠水湄。幽蘭吐芳烈。芙蓉發紅暉。百鳥何續翻。振翼羣相追。投網

三十卷詩選 卷一 王粲  
引潛魚強弩下高飛白日已西邁歡樂忽忘歸。

其三

聯翻飛鸞鳥獨遊無所因。毛羽照野草哀鳴入層雲。我尙假羽翼飛覩爾形身。願及春陽會交頸邁殷勤。

其四

鷲鳥化爲鳩遠竄江漢邊。遭遇風雲會託身鸞鳳間。天姿旣否戾受性又不閑。邂逅見逼迫俛仰不得言。

七哀詩

西京亂無象豺虎方邁患。復棄中國去委身適荆蠻。親戚對我悲朋友相追攀。出門無所見白骨蔽平原。路有飢婦人抱子棄草間。顧聞號泣聲揮涕獨不還。未知身死處何能兩相完。驅馬棄之去不忍聽此言。南登霸陵岸回首望長安。悟彼下泉人喟然傷心肝。

其二

荆蠻非我鄉何爲久滯淫。方舟溯大江日暮愁我心。山岡有餘映巖阿增重陰。狐狸

馳赴穴飛鳥翔故林。流波激清響。猴猿臨岸吟。迅風拂裳袂。白露沾衣襟。獨夜不能寐。攝衣起撫琴。絲桐感人情。爲我發悲音。羈旅無終極。憂思壯難任。

其三 見古文苑

邊城使心悲。昔吾親更之。冰雪截肌膚。風飄無止期。百里不見人。草木誰當遲。登城望亭隧。翩翩飛戍旗。行者不顧返。出門與家辭。子弟多俘虜。哭泣無已時。天下盡樂土。何爲久畱茲。蓼蟲不知辛。去來勿與諮。

○詠史詩

自古無殉死。達人所共知。秦穆殺三良。惜哉空爾爲。結髮事明君。受恩良未訾。賈逵國語注曰訾量也臨沒要之死。焉得不相隨。妻子當門泣。兄弟哭路陲。臨穴呼蒼天。涕下如綆縻。人生各有志。終不爲此移。同知埋身劇。心亦有所施。生爲百夫雄。死爲壯士規。黃鳥作哀詩。至今身不虧。

○公讌詩

昊天降豐澤。百卉挺葳蕤。涼風撤蒸暑。清雲卻炎暉。高會君子堂。竝坐蔭華棖。嘉肴充圓方。旨酒盈金罍。管絃發徽音。曲度清且悲。合坐同所樂。但想杯行遲。常聞詩人

語不醉且無歸。今日不極歡。含情欲待誰。見眷良不翅。守分豈能違。古人有遺言。君子福所綏。願我賢主人。與天享巍巍。克符周公業。奕世不可追。

△○從軍行

樂府解題曰從軍行皆軍旅苦辛之辭廣題曰左延年詞曰苦哉邊地人陳伏知道又有從軍五更轉

從軍有苦樂。但問所從誰。所從神且武。焉得久勞師。相公征關右。赫怒震天威。一舉滅獯虜。再舉服羌夷。西收邊地賊。忽若俯拾遺。陳賞越邱山。酒肉踰川坻。軍人多沃饒。人馬皆溢肥。徒行兼乘還。空出有餘資。拓地三千里。往返速如飛。歌舞入鄴城。良願獲無違。晝一作盡日處大朝。日暮薄言歸。外參時明政。內不廢家私。禽獸憚為犧。良苗實已揮。竊慕負鼎翁。願厲朽鈍姿。定安按文選無此二句今從樂府詩集及漢魏百三名家集補入不能效沮溺。相隨把鋤犁。熟覽夫子詩。信知所言非。

△○其二

涼風厲秋節。司典告詳刑。我君順時發。桓桓東南征。泛舟蓋長川。陳卒被隰坳。征夫懷親戚。誰能無戀一作情。拊衿倚舟檣。眷眷思鄴城。哀彼東山人。喟然感鶴鳴。日月不安處。人誰獲常甯。昔人從公旦。一祖輒三齡。今我神武師。暫往必速平。棄余親睦恩。輸力竭忠貞。懼無一夫用。報我素餐誠。夙夜自忤性。廣雅曰忤忤也普耕切思逝若抽縈。將

秉先登羽。豈敢聽金聲。後漢書賈復擊金犢於射犬被羽先登

△○其三

從軍征遐路。討彼東南夷。方舟順廣川。薄暮未安坻。白日半西山。桑梓有餘暉。蟋蟀夾岸鳴。孤鳥翩翩飛。征夫心多懷。悽愴令吾悲。下船登高防。草露霑我衣。迴身赴牀寢。此愁當告誰。身服干戈事。豈得念所私。卽戎有授命。茲理不可違。定安按樂府詩集以此首屬上

首爲一今從文選改正

△○其四

朝發鄴都橋。暮濟白馬津。逍遙河隄上。左右望我軍。連舫踰萬艘。帶甲千萬人。率彼東南路。將定一舉勳。籌策運帷幄。一由我聖君。恨我無時謀。譬諸具官臣。鞠躬中堅內。微畫無所陳。許歷爲完士。一言猶敗秦。史記秦伐韓趙奢救之今日有以軍事諫者死許歷請諫納之我有素餐責。誠愧伐檀人。雖無鉛刀用。庶幾奮薄身。

△○其五

悠悠涉荒路。靡靡我心愁。四望無煙火。但見林與邱。城郭生榛棘。蹊徑無所由。萑蒲竟廣澤。葭葦夾長流。日夕涼風發。翩翩漂吾舟。寒蟬在樹鳴。鸛鵠摩天遊。客子多悲

傷淚下不可收。朝入譙郡界。曠然消人憂。雞鳴達四境。黍稷盈原疇。館宅充塵里。士女滿莊馗。自非賢聖國。誰能享斯休。詩人美樂土。雖客亦願留。

本集有太廟頌三章雜言 兪兒舞歌四章長短句 贈蔡子篤四言 贈士孫文始四言 贈文叔良四言 思親詩四言 以皆非五言古故未鈔

劉公幹五古十二首以文選錄者識之

○公讌詩

永日行遊戲。歡樂猶未央。遺思在玄夜。相與復翱翔。輦車非素蓋。從者盈路旁。月出照園中。珍木鬱蒼蒼。清川過石渠。流波為魚防。芙蓉散其華。菡萏溢金塘。靈鳥宿水裔。仁獸遊飛梁。華館寄流波。豁達來風涼。生平未始聞。歌之安能詳。投翰長歎息。綺麗不可忘。

○贈五官中郎將

昔我從元后。整駕出一作至南鄉。過彼豐沛都。與君共翱翔。四節相推斥。季冬風且涼。眾賓會廣坐。明燈熅炎光。清歌製妙聲。萬舞在中堂。金罍含甘醴。羽觴行無方。長夜忘歸來。聊且為太康。四牡向路馳。歡悅誠未央。

○其二

余嬰沈痼疾。竄身清漳濱。自夏涉玄冬。彌曠十餘旬。常恐游岱宗。不復見古人所親。一何篤。步步趾慰我身。清談同日夕。情盼敘憂勤。便復爲別辭。游車歸西鄰。素葉隨風起。廣路揚埃塵。逝者如流水。哀此遂離分。追問何時會。要我以陽春。望慕結不解。貽爾新詞文。勉哉修令德。北面自寵珍。

其三

秋日多悲懷。感慨以長歎。終夜不遑寐。敘意於濡翰。明燈曜閨中。清風淒已寒。白露塗前庭。應門重其關。四節相推斥。歲月忽欲殫。壯士遠出征。戎事將獨難。涕泣灑衣裳。能不懷所歡。

其四

涼風吹沙礫。霜氣何皚皚。明月照緹幕。華燈散炎暉。賦詩連篇章。極夜不知歸。君侯多壯思。文雅縱橫飛。小臣信頑鹵。僂俛安能追。

贈徐幹

誰謂相去遠。隔此西掖園。拘限清切禁。中情無由宣。思子沈心曲。長歎不能言。起坐失次第。一日三四遷。步出北寺門。遙望西苑園。細柳夾道生。方塘含清源。輕葉隨風

轉飛鳥何翻翻。乖人感易動。涕下與杙連。仰視白日光。皦皦高且懸。兼燭八紘內。物類無頗偏。我獨抱深感。不得與比焉。

○贈從弟

汎汎東流水。磷磷水中石。蘋藻生其涯。華葉紛擾溺。采之薦宗廟。可以羞嘉客。豈無園中葵。懿此出深澤。

○其二

亭亭山上松。瑟瑟谷中風。風聲一何盛。松枝一何勁。冰霜正慘悽。終歲常端正。豈不罹凝寒。松柏有本性。

○其三

鳳皇集南岳。徘徊孤竹根。於心有不厭。奮翅凌紫氛。豈不常勤苦。羞與黃雀羣。何時當來儀。將須聖明君。

○雜詩

職事相煩一作煩。填委文墨。紛消散馳翰。未暇食日昃。不知晏沈迷。簿領書回回。自昏亂釋此出西城。登高且游觀。方塘含白水。中有島與鴈。安能肅肅羽。從爾浮波瀾。

鬪雞

丹雞被華采雙距如鋒芒願以揚炎威會戰此中唐利爪探玉除瞋目含火光長翹驚風起勁翮正敷張輕舉奮句喙電擊復還翔。

射鳶

鳴鳶弄雙翼飄飄薄青雲我后橫怒起意氣凌神仙發機如驚竅三發兩鳶連流血灑牆屋飛毛從風旋庶士同聲贊君射一何妍。

本集有失題二首以文闕故未鈔

阮嗣宗五古八十二首

文選錄詠懷詩三十八首以△識之舊說節鈔一二陳氏說節鈔十之六七其前人論說所未及國藩間有窺測亦附書焉尚有數首義不可通遂闕所疑以俟達者

詠懷

顏延年云阮公身事亂朝常恐遇禍因茲詠懷雖志在譏刺而文多隱避百代之下難以情測故麤明大意略其幽旨也詩統云阮集傳之既久頗存譌闕校錄者往往肆為補綴作者之旨淆亂甚焉今以諸本參校其義稍優

夜中不能寐起坐彈鳴琴薄帷鑒明月清風吹我衿孤鴻號外野翔鳥鳴北林徘徊

將何見憂思獨傷心識度

△○其二

二妃遊江濱。逍遙順風翔。交甫懷環佩。婉孌有芬芳。猗靡情歡愛。千載不相忘。傾城迷下蔡。容好結中腸。感激生憂思。萱草樹蘭房。膏沐爲誰施。其雨怨朝陽。如何金石交。一旦更離傷。識度。陳沆曰。司馬父子隱譎險詐。姦而不雄。詠懷詩中多以妾婦譏之。

△○其三

嘉樹下成蹊。東園桃與李。秋風吹飛藿。零落從此始。繁華有憔悴。堂上生荆杞。驅馬舍之去。去上西山趾。一身不自保。何況戀妻子。凝霜被野草。歲暮亦云已。識度。陳沆曰。司馬

懿盡錄。魏王公置於鄴。嘉樹零落。繁華憔悴。皆宗枝剪除之喻也。

△○其四

天馬出西北。由來從東道。春秋非有託。富貴焉常保。清露被皋蘭。凝霜霑野草。朝爲媚少年。夕暮成醜老。自非王子晉。誰能常美好。識度。陳沆云。馬出西極東道主人。引之使來。司馬氏本人臣。由魏帝致

之使盛少年。倏老。喻魏之全盛。倏衰也。馬卽典午之姓。

△○其五

平生少年時。輕薄好絃歌。西遊咸陽中。趙李相經過。娛樂未終極。白日忽蹉跎。驅馬復來歸。反顧望三河。黃金百鎰盡。資用常苦多。北臨太行道。失路將如何。識度。錄云。丹

阮籍詠懷詩西遊咸陽市趙李相經過顏延年以為趙飛燕李夫人劉會孟謂安知非實有此人不必求其誰何也不詳詩意咸陽趙李謂游俠近侍之儔漢谷永傳小臣趙李從微賤貴寵成帝常與微行籍用趙李字正出此若如顏延年之說趙飛燕李夫人豈可言經過如劉會孟言當時實有此人唐王維詩亦有日夜經過趙李家豈唐時之實有此人乎乃知讀書不詳考深思雖如延年之博學會孟之精鑒亦不免失之比下此者邪詩話補遺云按漢書乃趙季李款○陳沆以首四句比魏之盛時白日蹉跎比比明帝之崩失路比國家之失權

△其六

昔聞東陵瓜近在青門外連畛距阡陌子母相鉤帶五色曜朝日嘉賓四面會膏火

自煎熬多財為患害布衣可終身寵祿豈足賴

識度。此首阮公以邵平自比膏火二句亦譏趨附權勢者

△其七

炎暑惟茲夏三旬將欲移芳樹垂綠葉青雲自逶迤四時更代謝日月遞參差徘徊

空堂上切怛莫我知願覩卒歡好不見悲別離

識度。魏甘露五年六月甲寅司馬昭立常道鄉公在月之三日陳沆謂

此詩即指此事三句將欲移云者謂過三句即移秋節也願覩卒歡好云者恐其復為齊王芳高貴鄉公之續也

△其八

灼灼西墮日餘光照我衣迴風吹四壁寒鳥相因依周周尚銜羽蛩蛩亦念飢如何當路子磬折忘所歸豈為夸譽名憔悴使心悲甯與燕雀翔不隨黃鵠飛黃鵠遊四

海中路將安歸。識度。陳沆氏以磬折志歸為譏黨附司馬氏者未知然否至謂未四句為阮公自命之詞鑿黃鵠之失路甯燕雀以卑棲則深得本指矣。

△○其九

步出上東門。北望首陽岑。下有采薇士。上有嘉樹林。良辰在何許。凝霜霑衣襟。寒風

振山岡。玄雲起重陰。鳴雁飛南征。鷓鴣發哀音。素質游商聲。悽愴傷我心。識度。首四句阮公

以伯夷自況鷓鴣似亦刺趨時附勢之小人

△○其十

北里多奇舞。濮上有微音。輕薄間遊子。俯仰乍浮沈。捷徑從狹路。僮俛趨荒淫。馬見

王子喬。乘雲翔鄧林。獨有延年術。可以慰我心。識度。陳沆氏謂此章譏黨附司馬氏者愚謂前六句似譏鄧颺何晏之

徒後四句則自況之語言雖不能避世高舉猶可全生遠害耳

△○其十一

湛湛長江水。上有楓樹林。皋蘭被徑路。青驪逝駸駸。遠望令人悲。春風感我心。三楚

多秀士。朝雲進荒淫。朱華振芬芳。高蔡相追尋。一為黃雀哀。淚下誰能禁。識度。陳沆云楚襄

比魏明帝蔡靈侯比曹爽朱華芬芳謂私取才人為伎樂高蔡追尋謂兄弟數出宴游公子挾彈規黃雀比曹爽為司馬懿所圖

△○其十二

昔日繁華子。安陵與龍陽。天天桃李花。灼灼有輝光。悅懌若九春。磬折似秋霜。流盼發姿媚。言笑吐芬芳。攜手等歡愛。宿夕同衣裳。願為雙飛鳥。比翼共翱翔。丹青著明誓。永世不相忘。識度。舊說安陵龍陽以色事楚魏之主。尚盡忠如此。而晉文王蒙以丹青明誓。指司馬懿受魏文帝明帝兩世託孤寄命之重。不應背之。

△○其十三

登高臨四野。北望青山阿。松柏翳岡岑。飛鳥鳴相過。感慨懷辛酸。怨毒常苦多。李公悲東門。蘇子狹三河。求仁自得仁。豈復歎咨嗟。識度。陳沆氏謂此章譏黨附司馬氏者如鍾會成濟之徒。終亦不得其死也。求仁得仁。猶云求禍得禍。蘇李之誅死自取之耳。

△○其十四

開秋兆涼氣。蟋蟀鳴床帷。感物懷殷憂。悄悄令心悲。多言焉所告。繁辭將訴誰。微風吹羅袂。明月耀清暉。晨雞鳴高樹。命駕起旋歸。識度。舊說晨雞知時者。旋歸將返山林以避世也。

△○其十五

昔年十四五。志尚好書詩。被褐懷珠玉。顏閔相與期。開軒臨四野。登高望所思。邱墓

蔽山岡。萬代同一時。千秋萬歲後。榮名安所之。乃悟羨門子。噉噉今自嗤。識度。此首自述其

抗志自修。遐世無悶。千秋二句言榮名不足稱。羨門二句言長生不足慕。但求有自修之實耳。

△其十六

徘徊蓬池上。還顧望大梁。綠水揚洪波。曠野莽茫茫。走獸交橫馳。飛鳥相隨翔。是時

鵠火中。日月正相望。朔風厲嚴寒。陰氣下微霜。羈旅無儔匹。俛仰懷哀傷。小人計其

功。君子道其常。豈惜終憔悴。詠言著斯章。識度。陳沆曰。大梁指魏也。左傳晉伐虢。必是時也。嘉平六年九月甲戌。司馬師廢帝為齊王。乃十九日。十月庚寅。立高貴鄉公。正九月十月之交。鵠火中之時也。司馬師先定謀而後白。太后其在九月十五日。

日月相望時乎。

△其十七

獨坐空堂上。誰可與歡者。出門臨永路。不見行車馬。登高望九州。悠悠分曠野。孤鳥

西北飛。離獸東南下。日暮思親友。晤言用自寫。識度。陳沆曰。悼國無人也。我瞻四方。蹙蹙靡所騁。途窮能無慟乎。孤鳥

離獸。士不西走。蜀則南走。吳耳。

△其十八

懸車在西南。羲和將欲傾。流光曜四海。忽忽至夕冥。朝為咸池暉。濛汜受其榮。豈知

窮達士一死不再生。視彼桃李花。誰能久熒熒。君子在何許。曠世未合并。瞻仰景山松。可以慰吾情。首四句言魏祚將傾。朝為二句指前此被魏之恩澤者。豈知六句言夏侯之屬云亡。徇國之人未見景山松。似有所指之人。可信其勁節不改者。

其十九

西方有佳人。皎若白日光。被服織羅衣。左右珮雙璜。修容耀姿美。順風振微芳。登高眺所思。舉袂當朝陽。寄顏雲霄間。揮袖凌虛翔。飄飄恍惚中。流眄顧我旁。悅懌未交接。晤言用感傷。當集作向

△其二十

楊朱泣路歧。墨子悲染絲。揖讓長離別。飄颻難與期。豈徒燕婉情。存亡誠有之。蕭索人所悲。禍釁不可辭。趙女媚中山。謙柔愈見欺。嗟嗟塗上士。何用自保持。陳沈氏以此首與二妃游江濱。昔日繁華子。二章同類。并觀皆以妾婦譏司馬氏也。國藩按歧路染絲言變遷不定。翻覆無常。不特燕婉之青如此。即國之存亡亦不過一反覆閒耳。

其二十一

於心懷寸陰。羲陽將欲冥。揮袂撫長劍。仰觀浮雲征。雲間有玄鶴。阮公自況之詞。抗志揚哀聲。一飛冲青天。曠世不再鳴。豈與鶉鷄遊。連翩戲中庭。京師曹氏家藏阮步兵詩一卷。唐人所書。與世所傳多異。

其一篇云放心懷寸陰義和將欲冥揮袂撫長劍仰觀浮雲行雲間有立鵠抗首揚哀聲一飛冲青天疆世不再鳴安與鷓鴣遊翩翩戲中庭孔宗翰亦有本與此多同

其二十二

夏后乘靈輿。夸父爲鄧林。存亡從變化。日月有浮沈。鳳凰鳴參差。伶倫發其音。王子好簫管。世世相追尋。誰言不可見。青鳥明我心。

其二十三

東南有射山。汾水出其陽。六龍服氣輿。雲蓋切天綱。仙者四五人。逍遙晏蘭房。寢息一純和。呼噏成露霜。沐浴丹淵中。炤耀日月光。豈安通靈臺。游養去高翔。切一作覆通集作邇

其二十四

殷憂令志結。怵惕常若驚。逍遙未終晏。朱陽忽西傾。蟋蟀在戶牖。螭蛄號中庭。心腸未相好。誰云諒我情。願爲雲間鳥。千里一哀鳴。三芝延瀛洲。遠遊可長生。

其二十五

拔劍臨白刃。安能相中傷。但畏工言子。稱我三江旁。飛泉流玉山。懸車棲扶桑。日月徑千里。素風發微霜。勢路有窮達。咨嗟安可長。

其二十六

朝登洪坡顛。日夕望西山。荆棘被原野。羣鳥飛翩翩。鸞鷲時棲宿。性命有自然。建木誰能近。射干復嬋娟。不見林中葛。延蔓相勾連。時集作特

其二十七

周鄭天下交。街術當三河。妖冶間都子。煥燿何芬葩。玄髮發朱顏。睇眄有光華。傾城思一顧。遺視來相誇。願為三春遊。朝陽忽蹉跎。盛衰在須臾。離別將如何。發一作照。誇初學作

週

△其二十八

若花耀西海。扶桑翳瀛洲。日月經天塗。明暗不相讐。窮達自有常。得失又何求。豈效路上童。攜手共遨遊。陰陽有變化。誰云沈不浮。朱鼈躍飛泉。夜飛過吳洲。俯仰運天地。再撫四海流。繫累名利塲。驚駭同一軌。豈若遺耳目。升遐去殷憂。首四句謂日往月來。月往日來。

互有屈伸不相讐。怨人生有達。卽有窮。有得。卽有失。又何怨哉。豈效二句言不學世上小兒營營。干求朱鼈。元公以之自況。亦遠遊遺世之意。

△其二十九

昔余遊大梁。登于黃華顛。共工宅玄冥。高臺造青天。幽荒邈悠悠。悽愴懷所憐。所憐者誰子。明察自照妍。應龍沈冀州。妖女不得眠。肆侈凌世俗。豈云永厥年。詩話補遺云阮籍詩

昔余遊大梁登於黃華顛應龍沈冀州妖女不得眠按戰國策趙武靈西至河登黃華之上夢處女鼓琴歌詩因納吳廣女娃嬴孟姚其先七世而兆於簡子之夢及入宮而奪嫡亂國豈非妖女乎張平子應問曰女魁北而應龍翔合而觀之可見其微意蓋當是時魏明帝郭后毛后如寵相殺正類武靈王事故隱語怪說亦春秋定哀多微辭意也。陳沆曰大梁魏也女魁處共工之臺主旱以比司馬氏應龍沈冀州之野主雨以比玄爽晏範之儔矜智自負奢侈荒宴自取敗亡也

其三十一

驅馬出門去意欲遠征行。征行安所如背奔夸與名。夸名不在己但願適中情。單帷蔽皎日高樹隔微聲。讒邪使交疏浮雲令晝冥。嫵婉同衣裳一顧傾人城。從容在一時繁華不再榮。晨朝奄復暮不見所歡形。黃鳥東南飛寄言謝友生。

其三十二

駕言發魏都南向望吹臺。簫管有遺音梁王安在哉。戰士食糟糠賢者處蒿萊。歌舞曲未終秦兵已復來。夾林非吾有朱宮生塵埃。軍敗華陽下身竟為土灰。世說新語云桓玄西下入石頭外白司馬梁王奔叛時事形已濟在平乘上笳鼓竝作直高詠云簫管有遺音梁王安在哉文昌雜錄云東京記天清寺繁臺梁孝王按歌吹之臺阮公詩云駕言發魏都南向望吹臺簫管有餘音梁王安在哉後有繁氏居其側里人呼為繁臺陳沆云魏都即指曹魏也明帝末年歌舞荒淫不知求賢講武以致亡國

其三十三

朝陽不再盛白日忽西幽。去此若俯仰如何似九秋。人生若塵露天道邈悠悠。齊景

升邱山。涕泗紛交流。孔聖臨長川。惜逝忽若浮。去者余不及。來者吾不畱。願登太華山。上與松子遊。漁父知世患。乘流泛輕舟。識度。此亦汲汲自修之意。

△其三十三

一日復一夕。一夕復一朝。顏色改平常。精神自損消。胸中懷湯火。變化故相招。萬事無窮極。知謀苦不饒。但恐須臾間。魂氣隨風飄。終身履薄冰。誰知我心焦。識度。極一作理司。

馬師嘗謂阮嗣宗至慎。每與言終日。言至玄遠。未嘗臧否人物。

其三十四

一日復一朝。一昏復一晨。容色改平常。精神自飄淪。臨觴多哀楚。思我故時人。對酒不能言。悽愴懷酸辛。願耕東皋陽。誰與守其真。愁苦在一時。高行傷微身。曲直何所為。龍蛇爲我隣。揚雄傳云。君子得時則大行。不得時則龍蛇。龍蛇者一曲一直一伸一屈如危行也。言孫卽屈也。此詩畏高行之見傷。必言孫以自屈。

龍蛇之道也。

△其三十五

世務何續紛。人道苦不遑。壯年以時逝。朝露待太陽。願攬羲和轡。白日不移光。天階路殊絕。雲漢邈無梁。濯髮陽谷濱。遠遊崑岳旁。登彼列仙岵。采此秋蘭芳。時路烏足

爭太極可翱翔

願攬二句有魯陽揮戈駐景之意白日不移光云者欲使魏

其三十六

誰言萬事躋逍遙

莊子篇名

可終生臨堂翳華樹悠悠念無形彷徨思親友倏忽復至冥

寄言東飛鳥可用慰我情

無形言無生之始也莊子溯其始而本無形非徒無形也而本無生翳華樹日中時也至冥則夕矣

其三十七

嘉時在今辰零雨

似當作靈雨

灑塵埃臨路望所思日夕復不來人情有感慨蕩漾焉能

挑揮涕懷哀傷辛酸誰語哉

天之道陰求陽陽求陰氣也人之道男求女女求男情也古人不遇為不偶詩騷之稱美人皆求君求友也

此詩之望所思亦求友之意似有所指言天時既嘉道路無塵而美人不來能無感慨

其三十八

炎光延萬里洪川蕩湍瀨彎弓掛扶桑長劍倚天外泰山成砥礪黃河為裳帶視彼

莊周子榮枯何足賴捐身棄中野烏鳶作患害豈若雄傑士功名從此大

此首有屈原遠遊之

志高舉出世之想

其三十九

壯士何慷慨志欲威八荒驅車遠行役受命念自忘良弓挾烏號明甲有精光臨難

不顧生身死。魂飛揚。豈爲全軀士。效命爭戰場。忠爲百世榮。義使令名彰。垂聲謝後世。氣節故有常。此首似指王凌諸葛誕母邱儉之徒

△其四十

混元生兩儀。四象運衡璣。曠日布炎精。素月垂景暉。晷度有昭回。哀哉人命微。飄若風塵逝。忽若慶雲晞。修齡適余願。光寵非己威。安期步天路。松子與世違。焉得凌霄翼。飄颻登雲湄。嗟哉尼父志。何爲居九夷。陳沆曰光寵非己威謂趙孟能賤之也方欲延齡世外遺身霄路即尼父居九夷且非所慕况肯希當世之寵榮乎

其四十一

天網彌四野。六翮掩不舒。隨波紛綸客。集作落汎汎若浮鳧。一作鳥鷺生命無期度。朝夕有不虞。列仙停修齡。養志在冲虛。飄颻雲日間。邈與世路殊。榮名非己寶。聲色焉足娛。採藥無旋返。神仙志不符。逼此良可惑。令我久躊躇。首四句謂晉氏網羅人才庸庸者皆見錄用生命無期度以下

阮公自喻其遊於世網之外

其四十二

王業須良輔。建功俟英雄。元凱康哉美。多士頌聲隆。陰陽有舛錯。日月不常融。天時

有否泰。人事多盈沖。園綺遯南岳。伯陽隱西戎。保身念道真。寵耀焉足崇。人誰不善始。甚能克厥終。休哉上世士。萬載垂清風。

首四句言魏三祖時多良輔賢士陰陽四句指齊王芳以後之事園綺入句阮公以

其四十三

鴻鵠相隨飛。飛飛適荒裔。雙翮臨長風。須臾萬里逝。朝餐琅玕實。夕宿丹山際。抗身

青雲中。網羅孰能制。豈與鄉曲士。攜手共言誓。

其四十四

儔物終始殊。脩短各異方。琅玕生高山。芝英曜朱堂。熒熒桃李花。成蹊將天傷。焉敢

希千術。三春表微光。自非凌風樹。憔悴烏一作要有常。

焉敢二句當有誤字凌風樹亦阮公以自況者有託根霄漢終古不凋之意

其四十五

幽蘭不可佩。朱草為誰榮。修竹隱山陰。射干臨增城。葛藟延幽谷。縣縣瓜瓞生。樂極

消靈神。哀深傷人情。竟知憂無益。豈若歸太清。

其四十六

幽蘭四句喻當世之賢士葛藟二句喻當世之在勢者

鷲鳩飛桑榆。海鳥運天池。豈不識宏大。羽翼不相宜。招搖安可翔。不若棲樹枝。下集

蓬艾間。上遊園圃籬。但爾亦自足。用子指鷲鳩為追隨。此首藝文類聚所載與今本不同而義意近優觀李善文選注

江文通擬詠懷詩所引與藝文同亦一證也今從藝文定正。此首似以鷲鳩自比以明不慕高位不貪遠圖之意

△其四十七

生命辰安在。憂戚涕沾襟。高鳥翔山岡。鷲雀棲下林。青雲蔽前庭。素琴悽我心。崇山有鳴鶴。豈可相追尋。

其四十八

鳴鳩嬉庭樹。焦明遊浮雲。焉見孤翔鳥。翩翩無匹羣。死生自然理。消散何續紛。漢魏詩集

合前為一首。上林賦注焦明似鳳西方之鳥也此與鳴鳩竝舉殊覺不倫末二句與前四句尤為不倫疑亦後人所附益也

△其四十九

步遊三衢旁。惆悵念所思。豈為今朝見。恍惚誠有之。澤中生喬松。萬世未可期。高鳥

摩天飛。凌雲共遊嬉。豈有孤行士。垂涕悲故時。喬松冀有國楨扶魏祚於將傾者高鳥自喻其遺世外也末二句謂有伯

夷之心而不學伯夷之迹也

其五十

清露爲凝霜。華草成蒿萊。誰云君子賢。明達安可能。乘雲招松喬。呼噏永矣哉。明達似指一死生齊彭殤者言之

△其五十一

丹心失恩澤。重德喪所宜。善言焉可長。慈惠未易施。不見南飛燕。羽翼正差池。高子怨新詩。二閭悼乖離。何爲混沌氏。倏忽體貌隳。首四句言曹氏施厚澤於司馬而遭其反噬末二句言司馬氏機智可怖

△其五十二

十日出暘谷。弭節馳萬里。經天耀四海。倏忽潛濛汜。誰言焱炎久。遊沒可行俟。逝者豈長生。亦去荆與杞。千載猶崇朝。一餐聊自己。一作百金子是非得失閒。焉足相譏理。計

利知術窮。哀情遽一作能止。陳沆曰此達觀自遣也白日經天有時淪沒運無常隆替亦行可俟也

其五十三

自然有成理。生死道無常。智巧萬端出。大要不易方。如何夸毘子。作色懷驕腸。乘軒驅良馬。憑几向膏梁。被服織羅衣。深榭設閒房。不見日夕華。翩翩飛路旁。識度大要不易方

云者謂貧富貴賤死生禍福皆有自然之理雖智巧萬端不能逃出範圍之外末二句言花有榮必有落人有盛必有衰也

△其五十四

夸談快憤懣。情慵發煩心。西北登不周。東南望鄧林。曠野彌九州。崇山抗高岑。一餐度萬世。千歲再浮沈。誰云玉石同。淚下不可禁。情一作情。前八句有遠遊遺世之志。末二句言已雖生於濁世。豈其玉石不分。隨眾人之混混而昧於時代之變遷邪。

△其五十五

人言願延年。延年欲焉之。黃鵠呼子安。千秋未可期。獨坐山巖中。惻愴懷所思。王子亦何好。猗靡相攜持。悅懌猶今辰。計校在一時。置此明朝事。日夕將見欺。陳沆曰。此五年一章。王子皆指少帝也。此少帝謀討司馬師時所作。計校在一時。安危係此一舉也。國藩按。日夕將見欺。似用季平子日入慝作事。

其五十六

貴賤在天命。窮達自有時。婉變佞耶子。隨利來相欺。孤恩損惠施。但為讒夫蚩。鵲鴿鳴雲中。載飛靡所期。焉知傾側士。一旦不可持。鵲鴿且飛且鳴。詩小雅及東方朔答客難。皆以喻汲汲自修之士。此則似

譏汲汲附勢之人

其五十七

驚風振四野。迴雲蔭堂隅。牀帷為誰設。几杖為誰扶。雖非明君子。豈闇桑與榆。世有

此聾曠芒芒將焉如。翩翩從風飛，悠悠去故居。離麾玉山，下遺奔毀與譽。首四句有舉目山河之感，翩翩二句言時移勢殊，我亦遺世遠舉，不效世之聾曠貪戀祿位茫然不知玉步之已改也。

其五十八

危冠切浮雲，長劍出天外。細故何足慮，高度跨一世。非子秦之先世為我御，逍遙遊荒裔。顧謝西王母，吾將從此逝。豈與蓬戶士，彈琴誦言誓。此首亦有高舉遺世之意，末二句似譏拘守禮法之士。

其五十九

河上有丈人，緯蕭弃明珠。甘彼藜藿食，樂是蓬蒿廬。豈效續紛子，良馬騁龍輿。朝生衢路傍，夕瘞橫術隅。歡笑不終宴，俛仰復欷歔。鑒茲二三識度者似亦者，憤懣從此舒。三者似亦

刺魏臣而二心於晉旋盛旋敗者

其六十

儒者通六藝，立志不可干。違禮不為動，非法不肯言。渴飲清泉流，饑食天一簞。歲時無以祀，衣服常苦寒。屣履詠南風，緼袍笑華軒。信道守詩書，義不受一餐。烈烈褒貶辭，老氏用長歎。識度。藝一作義，干一作甘。陳沆曰：此歎漢黨錮諸儒危行而不言孫故，章末以老規儒也。烏用月旦之評清流之目哉。

其六十一

少年學擊刺。妙伎過曲城。英風捷雲霓。超世發奇聲。揮劍臨沙漠。飲馬九野坰。旗幟何翩翩。但聞金鼓鳴。軍旅令人悲。烈烈有哀情。念我平常時。悔恨從此生。刺集作劍軍立功而晚節悔恨者念仇敵不在吳蜀而在堂廉之間也

其六十二

平晝整衣冠。思見客與賓。賓客者誰子。倏忽若飛塵。裳衣佩雲氣。言語究靈神。須臾相背棄。何時見斯人。此首或指孫登嵇康之流

其六十三

多慮令志散。寂寞使心憂。翱翔觀陂一作澤。撫劍登輕舟。但願長閒暇。後歲復來遊。此首自述其韜精匿志觀物自怡之素

其六十四

朝出上東門。遙望首陽基。松柏鬱森沈。鸚黃相與嬉。逍遙九曲間。徘徊欲何之。念我平居時。鬱然思妖姬。首二句與第九首相似而其基字不如岑字之穩末句思妖姬語尤不倫疑非阮公詩後人附益之耳

△其六十五

王子十五年。遊衍伊洛濱。朱顏茂春華。辯慧懷清真。焉見浮邱公。舉手謝時人。輕蕩

易恍惚飄飄棄其身。飛飛鳴且翔。揮翼且酸辛。陳沆曰此言明帝不能辨司馬懿之奸輕以愛子付託也以王子晉比曹

芳以浮邱比司馬懿

△其六十六

塞一作寒門不可出海水。焉可浮。朱明不相見。奄昧獨無侯。持瓜思東陵。黃雀誠獨羞。

失勢在須臾。帶劍上吾邱。悼彼桑林子。涕下自交流。假乘汧渭閒。鞍馬去行遊。丹鉛錄

云漢武時事武帝崩後忽見形謂陵令薛平日我雖失勢猶為汝君柰何令吏卒上吾陵磨劍乎因不見推陵旁果有方石可以為礪吏卒嘗盜磨刀劍霍光欲斬之張安世曰神道茫昧不宜為法故阮公詠懷詩曰失勢在須臾帶劍上吾邱陳沆氏以失勢二句為刺背魏附晉之輩未知然否

△其六十七

洪生資制度。被服正有常。尊卑設次序。事物齊紀綱。容飾整顏色。磬折執圭璋。堂上

置玄酒。室中盛稻粱。外厲貞素談。戶內滅芬芳。放口從衷出。復說道義方。委曲周旋

儀姿態愁我腸。此首似譏司馬懿厚貌深情善自厲飾

其六十八

北臨乾昧谿。西行遊少任。遙顧望天津。貽蕩樂我心。綺靡存亡門。一遊不再尋。儻遇

晨風鳥飛駕。出南一作東林。潏潏瀆瑤光中。忽忽肆荒淫。休息宴清都。超世又誰禁。一作起坐

復誰  
禁

其六十九

人知結交易。交友誠獨難。險路多疑惑。明珠未可干。彼求饗太牢。我欲并一餐。損益

在疑當怨毒。咄咄復何言。明珠句似用鄒陽明珠闇投之意干即投也并一餐即并

道不可持也

其七十

有悲則有情。無悲亦無思。集作無情亦無悲苟非嬰網罟。何必萬里畿。翔風拂重霄。慶雲招

所晞。灰心寄枯宅。曷顧人間姿。始得忘我難。焉知嘿自遺。

其七十一

木槿榮邱墓。煌煌有光色。白日頽林中。翩翩零路側。蟋蟀吟戶牖。螻蛄鳴荆棘。蟉

玩三朝。采采修羽翼。衣裳為誰施。俛仰自收拭。生命幾何時。慷慨各努力。此首有冉冉將老修

名不立之感

其七十二

修塗馳軒車。長川載輕舟。性命豈自然。勢路有所繇。高名令志惑。重利使心憂。親昵

懷反側。骨以還相讐。更希毀珠玉。可用登遨遊。首四句刺馳騫於名利之途者勢路

毀方瓦合儉德避難之意末句疑有誤字

其七十三

橫術有奇士。黃駿服其箱。朝起瀛洲野。日夕宿明光。再撫四海外。羽翼自飛揚。去置

世上事。豈足愁我腸。一去長離絕。千歲復相望。去置疑當作棄置前六句似刺賈充鍾會之徒

其七十四

猗歟。上世士。恬淡志安貧。季葉道陵遲。馳騫紛垢塵。甯子豈不類。揚歌誰肯殉。棲棲

非我偶。皇皇非己倫。咄嗟榮辱事。去來味道真。道真信可娛。清潔存精神。巢由抗高

節。從此適河濱。識度。殉一作詢甯子二句謂甯戚非全不知道者而飯牛之歌果為何事而肯以身殉之也薄甯戚而慕巢由阮公之志事著矣咄嗟

猶須與也言榮來辱去辱來榮去不過須與間事吾但味吾道真而已

其七十五

梁東有芳草。一朝再三榮。色容豔姿美。光華耀傾城。豈為明哲士。妖蠱諂媚生。輕薄

在一時。安知百世名。路端便娟子。但恐日月傾。焉見冥靈木。悠悠竟無形。

其七十六

秋駕安可學。東野窮路旁。綸深魚淵潛。矰設鳥高翔。汎汎乘輕舟。演漾靡所望。吹噓誰以益。江湖相捐忘。都治難爲顏。修容是我常。茲年在松喬。恍惚誠未央。秋駕作稅

子逸篇尹儒學御三年而無所得夜夢受秋駕明日往朝師師曰今將教子以秋駕註曰秋駕法駕也國藩按秋駕二句言有才者終至蹉跌東野稷馬力已竭事見莊

### 其七十七

咄嗟行至老。僂俛常苦憂。臨州羨洪波。同始異支流。百年何足憂。但恐怨與讐。讐怨者誰子。耳目還相羞。聲色爲胡越。人情自逼遒。招彼玄通士。去來歸羨遊。此首謂死

恐有平生親好迫之死於非命同始異支流謂少年相好之人中道異趣也讐怨非他人乃平生親昵朝夕聞見之人一旦異趣談笑之際睇眄之間已成胡越此有憂生之嗟矣未句疑有誤字

### △其七十八

昔有神仙士。乃處射山阿。乘雲御飛龍。噓噏噦瓊華。可聞不可見。慷慨歎咨嗟。自傷非疇類。愁苦來相加。下學而上達。忽忽將如何。噦音機小食也終身履亦下學上達皆嗣宗吃緊爲人處

### 其七十九

林中有奇鳥。自言是鳳皇。清朝飲醴泉。日夕棲山岡。高鳴徹九州。延頸望八荒。適逢

商風起。羽翼自摧藏。一去崑崙西。何時復迴翔。但恨處非立。愴恨使心傷。鳳皇阮公自況也。處

非立三字疑有誤

其八十

出門望佳人。佳人豈在茲。三山招松喬。萬世誰與期。存亡有長短。慷慨將焉知。忽忽朝日隕。行行將何之。不見入秋草。摧折在今時。亡一作日。望佳人而不見。招松喬而不來。將抱孤芳而長逝耳。

其八十一

昔有神仙者。羨門及松喬。噲習九陽間。升近噉雲霄。人生樂長久。百世自言遼。白日隕隅谷。一夕不再朝。豈若遺世物。登明遂飄颻。

其八十二

墓前熒熒者。木槿耀朱華。榮好未終朝。車颺隕其葩。豈若西山草。琅玕與丹禾。垂影臨墉城。餘光照九阿。甯微少年子。日夕難咨嗟。此與四十四首七十一首語意重複。別無精義。疑亦後人附益之也。

潘安仁五古十二首

文選錄者以誌之

○金谷集作詩一首

王生和鼎寶。石子鎮海沂。

王生指王詡也。石子指石崇也。石崇出監青徐諸軍事。有別廬在金谷澗。時征西大將軍祭酒王詡當還長安。眾賢

其送澗中親友各言邁中心悵有違何以敘離思攜手游郊畿朝發晉京陽夕次金

因各賦詩親友各言邁中心悵有違何以敘離思攜手游郊畿朝發晉京陽夕次金

谷澗迴谿縈曲阻峻阪路威夷綠池泛淡淡青柳何依依濫泉龍鱗瀾一作激波連

珠揮前庭樹沙棠後園植烏桺西京雜記上林有烏桺沙棠樹靈囿繁石榭石善作若注廣雅石榭若榭也茂林列

芳黎飲至臨華沼遷坐登隆坻玄醴染朱顏但懣杯行遲揚桴撫靈鼓簫管清且悲

春榮誰不慕五臣作耀歲寒良獨希投分寄石友白首同所歸史記蘇秦謂齊王曰此棄仇讎而得石交也世說孫

秀既憾石崇不與綠珠又憾潘岳昔遇之不以禮後秀為中書令收石崇又收岳石曰安仁亦復爾耶潘曰可謂白首同所歸詩竟成讖

○河陽縣作

微身輕蟬翼弱冠忝嘉招在疚妨賢路再升上宰朝猥荷公叔舉連陪厠王寮長嘯

歸東山擁耒耨時苗幽谷茂纖葛峻巖敷榮條落英隕林趾飛莖秀陵喬卑高亦何

常升降在一朝徒恨良時泰小人道遂消譬如野田蓬幹流隨風飄昔倦都邑游今

掌河朔徭登城眷南顧凱風揚微綃洪流何浩蕩修芒鬱岌嶷誰謂晉京遠室邇身

實遼誰謂邑宰輕令名患不劭人生天地間百年孰能要歛如敲石火定安按歛選作頽爾雅頽

光也敲選作槁槁與考古字通譬若截道颺齊都無遺聲桐鄉有餘謠論語齊景公

詩弗擊弗考毛萇曰考亦擊也鄉晉夫及死邑人為之起家立祠福謙在純約害盈由矜驕雖無君人德視民庶

不忼。

其二

日夕陰雲起。登城望洪河。川氣冒山嶺。驚湍激巖阿。歸鴈映蘭時。五臣作詩游魚動圓波。

鳴蟬厲寒音。時菊耀秋華。引領望京室。南路在伐柯。大厦緬無覲。崇芒鬱嵯峨。大厦五臣

作大厦崇芒作北芒陸機洛陽記大厦門魏明帝造三層高百尺郭緣生述征記北芒去大厦門不盈一里總總都邑人。擾擾俗化訛。依

水類浮萍。寄松似懸蘿。朱博糾舒慢。楚風被琅邪。漢書朱博遷琅邪太守齊部舒緩

去地三尺禮節皆如楚趙曲蓬何以直。託身以叢麻。黔黎竟何常。政成在民和。位同單父邑。愧無

子賤歌。豈敢陋微官。但恐忝所荷。

在懷縣作

南陸迎修景。朱明送末垂。初伏啟新節。隆暑方赫曦。朝想慶雲興。夕遲白日移。揮汗

辭中宇。登城臨清池。涼飈自遠集。輕襟隨風吹。靈囿耀華果。通衢列高椅。椅梓屬瓜瓞

蔓長苞。薑芋紛廣畦。稻栽肅芊芊。黍苗何離離。虛薄乏時用。位微名日卑。驅役宰兩

邑。政績竟無施。自我違京輦。四載迄於斯。器非廊廟姿。屢出固其宜。徒懷越鳥志。眷

戀想南枝。

○其二

春秋代遷逝。四運紛可喜。寵辱易不驚。戀本難為思。定安按文選誤以此四句屬上首今從百三家集改正我來冰未泮。時暑忽隆熾。感此還期淹。歎彼年往駛。登城望郊甸。游目歷朝寺。小國寡民務。終日寂無事。白水過庭激。綠槐夾門植。信美非吾土。祇覺懷歸志。眷然顧鞏洛。山川邈離異。願言旋舊鄉。畏此簡書忌。祇奉社稷守。恪居處職司。

內顧詩

靜居懷所歡。登城望四澤。春草鬱青青。桑柘何奕奕。芳林振朱榮。淥水激素石。初征冰未泮。忽焉杳絺綌。漫漫三千里。迢迢遠行客。馳情戀朱顏。寸陰過盈尺。夜愁極清晨。朝悲終日夕。山川信悠悠。永願言良弗獲。引領訊歸期。沈思不可釋。

其二

獨悲安所慕。人生若朝露。綿邈寄絕域。眷戀想平素。爾情既來追。我心亦還顧。形體隔不達。精爽交中路。不見山下松。隆冬不易故。不見澗邊柏。歲寒守一度。無謂希見疏。在遠分彌固。

○悼亡詩

荏苒冬春謝。寒暑忽流易。之子歸窮泉。重壤永幽隔。私懷誰克從。淹留亦何益。僂俛  
恭朝命。迴心反初役。望廬思其人。入室想所歷。幃屏無髣髴。翰墨有餘迹。流芳未及  
歇。遺挂猶在壁。悵恍如或存。周遑忡驚惕。如彼翰林鳥。雙栖一朝隻。如彼游川魚。比  
目中路析。春風緣隙來。晨雷承簷滴。寢息何時忘。沈憂日盈積。庶幾有時衰。莊缶猶  
可擊。莊子妻死。惠子弔之。方箕踞鼓盆而歌。

○其二

皎皎窗中月。照我室南端。清商應秋至。溽暑隨節闕。凜凜涼風升。始覺夏衾單。豈曰  
無重纊。誰與同歲寒。歲寒無與同。朗月何朧朧。展轉盼枕席。長簟竟牀空。牀空委清  
塵。室虛來悲風。獨無李氏靈。髣髴視爾容。桓子新論武帝所幸李夫人死。方士李少君言能致其神。夜設燭。張幄。帝居他帳。遙見好女。似夫人之狀。撫衿長歎。息不覺涕霑胸。霑胸安能已。悲懷從中起。寢興日存形。遺音猶在耳。上慚東門吳。下愧蒙莊子。列子魏有東門吳者。死。子而賦詩欲言志。此志難具。紀命也可奈何。長戚自令鄙。

○其三

曜靈運天機。四節代遷逝。淒淒朝露泥。烈烈夕風厲。奈何悼淑儷。儀容永潛翳。念此

如昨日。誰知已卒歲。改服從朝政。衷心寄私制。茵幃張故房。朔望臨爾祭。爾祭詎幾時。朔望忽復盡。衾裳一毀撤。千載不復引。亶亶期月周。戚戚彌相愍。悲懷感物來。泣涕應情隕。駕言陟東阜。望墳思紆軫。徘徊墟墓間。欲去復不忍。徘徊不忍去。徙倚步踟躕。落葉委埏側。枯荻帶墳隅。孤魂獨熒熒。安知靈與無。投心遵朝命。揮涕強就車。誰謂帝宮遠。莊子知反帝宮路極悲有餘。

### 哀詩

漼如葉落樹。邈若雨絕天。雨絕有歸雲。葉落何時連。山氣冒岡嶺。長風鼓松柏。堂虛聞鳥聲。室暗如日夕。晝愁奄逮昏。夜思忽終昔。展轉獨悲窮。泣下沾枕席。人居天地閒。飄若遠行客。先後詎能幾。誰能弊金石。

### 思子詩

造化甄品物。天地代虛盈。柰何念稚子。懷奇隕幼齡。追想存髣髴。感道傷中情。一往何時還。千載不復生。

本集有關中詩十六章。為賈謐作贈陸機十一章。北芒送別王世胄一首。閣柱家風詩一首。於賈謐坐講漢書一首。離合一首。別詩一首。皆四言。謐一首。長短句。以皆非五言古故未鈔。

張茂先五古二十三首文選錄者以○識之樂府詩集錄者以△識之

門有車馬客行

門有車馬客。問君何鄉士。捷步往相訊。果是舊鄰里。語昔有故悲。論今無新喜。清晨相訪慰。日暮不能已。詞端競未究。忽唱分途始。前悲尙未弭。後憂方復起。

△輕薄篇樂府解題輕薄篇言乘肥馬衣輕裘馳騁經過為樂與少年行同意

末世多輕薄。驕代一作好浮華。志意既能一作放逸。貨財亦豐奢。被服極纖麗。肴膳盡

柔嘉。童僕餘梁肉。婢妾蹈綾羅。文軒樹羽蓋。乘馬鳴玉珂。橫簪刻玳瑁。長鞭錯象身。

足下金鑠履。手中雙莫邪。賓從煥絡繹。侍御何芬葩。朝與金張期。漢書金日磾贊七葉內侍何其盛也

張湯贊張氏子孫相繼自宣元已來為侍中中常侍者十餘功臣之後惟金氏張氏比於外戚暮宿許史家。漢書許皇后元帝母元

侯又史良娣宣帝祖母也兄恭宣帝封恭子高為樂陵侯甲第面長街。朱門赫嵯峩。蒼梧竹葉青。宜城九醞醪。浮

醪隨觴轉。素蟻自跳波。曹植酒賦或雲沸或素蟻浮萍美女興齊趙。妍唱出西巴。一顧城國傾。千

金甯樂府作不足多。北里獻奇舞。大陵奏名歌。新聲踰激楚。妙技絕陽阿。玄鶴降浮雲。鱗

魚躍中河。墨翟且停車。展季猶咨嗟。漢書鄒陽傳邑號朝歌墨子回車西京賦略藐

下惠也二句言難以墨子滄于鬢日州閭之會男女雜雍門坐相展季之貞正猶為之動也滄于前行酒。史記滄于鬢日州閭之會男女雜

和列子雍門人至今善孟公結重關賓客不得蹉漢書陳遵字孟公每大飲輒關門

三雅來何遲耳熱眼中花盤案互交錯坐席咸誼譁簪珥咸墮落冠冕皆傾邪酣飲

終日夜明燈繼朝霞絕纓尚不尤說苑楚莊王賜羣臣酒燈燭滅有引美人衣者安

能復顧他畱連彌信宿此歡難可過人生若浮寄年時忽蹉跎促促朝露期榮樂遽

幾何念此腸中悲涕下自滂沱但畏執法吏禮防且切磋。

△遊俠篇

翩翩四公子濁世稱賢名龍虎相交爭七國竝抗衡食客三千餘門下多豪英遊說

朝夕至辯士自縱橫孟嘗東出關濟身由雞鳴史記孟嘗君至函谷關恐追至客信

陵西反魏秦人不窺兵史記魏公子無忌畱趙十年秦日夜出兵伐魏魏王迎公子

趙勝南詛楚乃與毛遂行史記秦圍邯鄲趙使平原君求救於楚毛遂請

而上楚王叱之遂曰今十步之內王不得恃楚國之眾也黃歇北適秦太子還入荆

史記黃歇與太子完質於秦楚頃襄王病太子不得歸歇令太子變美哉遊俠士何

以尙四卿我則異於是好古師老彭。

△博陵王宮俠曲二首

俠客樂幽險。築室窮山陰。燎獵野獸稀。施網川無禽。歲暮飢寒至。慷慨頓足吟。窮令壯士激。安能懷苦心。干將坐自閒。一擊重千金。棲遲熊羆穴。容與虎豹林。身在法令外。縱逸常不禁。

雄兒任氣俠。聲蓋少年場。借友行報怨。殺人租市旁。吳刀鳴手中。利劍嚴秋霜。腰閒又素戟。手持白頭鑲。騰超如激電。迴旋如流光。奮擊當手決。交屍自縱橫。甯爲殤鬼雄。義不入圍墻。生從命子遊。死聞俠骨香。身沒心不懲。勇氣加四方。

△遊獵篇

歲暮凝霜結。堅冰沍幽泉。厲風蕩原隰。浮雲蔽昊天。玄雲掩黝合。素雪紛連翩。鷹隼始擊鷲。虞人獻時鮮。嚴駕鳴儔侶。攬轡過中田。戎車方四牡。文軒馭紫燕。輿徒旣整飭。容服麗且妍。武騎列重圍。前驅抗脩旃。倏忽似回飈。絡繹若浮煙。鼓譟山淵動。衝塵雲霧連。輕繒拂素電。織網蔭長川。游魚未暇竄。歸雁不得還。一作由基控繁弱。公差操黃閒。機發應弦倒。一縱連雙肩。僵禽正狼藉。落羽何翻翻。積獲被山阜。流血丹中原。馳騁未及勅。曜靈俄移晷。結罝彌鼓澤。囂聲振四鄙。鳥驚觸白刃。獸駭掛流矢。仰手接遊鴻。舉足蹴犀兕。如黃批狡兔。青駁撮飛雉。鵠鷺不盡收。鳧鷖安

足視日冥徒御勞。賞勤課能否。野饗會眾賓。玄酒甘且旨。燔炙播遺芳。金觴浮素蟻。珍羞墜歸雲。纖肴出淶水。四氣運不停。年時何亶亶。人生忽如寄。居世遽能幾。至人同禍福。達士等生死。榮辱渾一門。安知惡與美。遊放使心狂。覆車難再履。伯陽爲我誠。檢迹投清軌。

壯士篇

燕荆軻歌曰風蕭蕭兮易水寒壯士一去兮不復還壯士篇蓋出於此

天地相震蕩。回薄不知可。一作窮。人物稟常格。有始必有終。年時俛俯過。功名宜速崇。壯士懷憤激。安能守虛冲。乘我大宛馬。撫我繁弱弓。長劍橫九野。高冠拂玄穹。慷慨成素霓。嘯吒起清風。震響駭八荒。奮威曜四戎。濯鱗滄海畔。馳騁大漠中。獨步聖明世。四海稱英雄。

蕭史曲

藝文作張華樂府作鮑照然此詩詞格不類晉人當是鮑詩也

蕭史愛長年。一作少。嬴女羞童顏。火粒願排棄。霞霧好登攀。龍飛逸一作竟天路。鳳起出秦關。身去長不返。簫聲時往還。

上巳篇

仁風導和氣。句芒御昊春。姑洗應時月。元巳啟良辰。密雲蔭朝日。零雨灑微塵。飛軒

遊九野。置酒會眾賓。臨川懸廣幕。夾水布長茵。徘徊存往古。慷慨慕先真。朋從自遠至。童冠八九人。追好舞雩庭。擬跡洙泗濱。伶人理新樂。膳夫潔時珍。八音礪磬奉。肴俎從橫陳。妙舞起齊趙。悲歌出三秦。春體踰九醜。冬清過十旬。盛時不努力。歲暮將何因。勉哉眾君子。茂德景日新。高飛舞鳳翼。輕舉攀龍鱗。

○答何劭

吏道何其迫。窘然坐自拘。纓綉為徽纆。文憲焉可踰。纓綉制人同於徽纆。國之文憲豈可踰乎。鄭玄禮記注。綉纓飾

也。周易繫用徽纆。恬曠苦不足。煩促每有餘。良朋貽新詩。示我以游娛。穆如灑清風。煥若春

華敷。自昔同寮案。惠帝即位。劭為太子太師。華為太子少傅。故曰同寮。於今比園廬。衰疾近辱殆。庶幾竝懸輿。

漢書薛廣德乞骸骨。賜安車駟馬。懸其車傳。示子孫也。散髮重陰下。抱杖臨清渠。屬耳聽鷓鳴。流目翫儵魚。從

容養餘日。取樂於桑榆。

○其二

洪鈞陶萬類。大塊稟羣生。明闇信異姿。靜躁亦殊形。自予及有識。志不在功名。虛恬竊所好。文學少所經。忝荷既過任。白日已西傾。道長苦智短。責重困才輕。周任有遺規。其言明且清。負乘為我戒。夕惕坐自驚。是用感嘉貺。寫心出中誠。發篇雖溫麗。無

乃違其情。

其三

駕言歸外庭。放志永棲遲。相伴步園疇。春草鬱鬱滋。榮觀雖盈目。親友莫與偕。悟物增隆思。結戀慕同儕。援翰屬新詩。永歎有餘懷。

情詩

清風動帷簾。晨月照幽房。佳人處遐遠。蘭室無容光。襟懷擁虛景。輕衾覆空牀。居歡惜夜促。在戚怨宵長。拊五臣作撫枕獨嘯歎。感慨心內傷。

其二

游目四野外。逍遙獨延伫。蘭蕙緣清渠。繁華蔭綠渚。佳人不在茲。取此欲誰與。巢居知風寒。穴處識陰雨。春秋漢含孳穴藏先知雨陰暄未集魚已翔不會遠別離。安知慕儔侶。

其三

北方有佳人。端坐鼓鳴琴。終晨撫管絃。日夕不成音。憂來結不解。我思存所欽。君子尋時役。幽妾懷苦心。初為三載別。於今久滯淫。昔邪生戶牖。庭內自成陰。翔鳥鳴翠

偶草蟲相和吟。心悲易感激。俛仰淚流衿。願託晨風翼。東帶侍衣衾。

其四

明月曜清景。隴光照玄墀。幽人守靜夜。迴身入空帷。東帶俟將朝。廓落晨星稀。假寐交精爽。覲我佳人姿。巧笑媚權一作權。壓聯娟眸與眉。寤言增長歎。悽然心獨悲。

其五

君居北海陽。妾在江南陰。懸邈極脩途。一作脩途遠山川阻且深。承權注隆愛。結分投所

欽銜恩一作思。篤守義。萬里託微心。

感婚詩

駕言遊東邑。東邑紛禳禳。婚姻及良時。嫁娶避當梁。窈窕出閨女。嫵婉姬與姜。素顏發紅華。美日流清揚。鞞煒眾親盛。於我猶若常。譬彼暮春草。榮華不再陽。

雜詩

暑度隨天運。四時互相承。東壁正昏中。禮記仲冬之月。日昏東壁中。涸陰寒節升。繁華降當夕。悲風中夜興。朱火青無光。蘭膏坐自凝。重衾無暖氣。挾纒如懷冰。伏枕終遙夕。寤言莫子應。永思慮崇替。慨然獨拊膺。

其二

逍遙游春空。一作宮容與淶池阿。白蘋開素葉。朱草茂丹華。微風搖菡若。增波動菱荷。

榮彩曜中林。流馨入綺羅。王孫遊不歸。脩路邈以遐。誰與翫遺芳。伫立獨咨嗟。

其三

荏苒日月運。寒暑忽流易。同好逝不存。迢迢遠離析。房櫳自來風。戶庭無行迹。兼葭生牀下。蛛蝥網四壁。懷思豈不隆。感物重鬱積。遊鴈比翼翔。歸鴻知接翮。來哉彼君子。無愁徒自隔。

擬古 見藝文松類有詩無  
題古遺集云擬古

松生壠坂上。百尺下無枝。東南望河尾。西北隱崑崖。剛風振山籟。朋鳥夜驚離。悲涼貫年節。蔥翠恆若斯。安得草木心。不怨寒暑移。

招隱

棲遲四野外。陸沈背當時。循名掩不著。藏器待無期。羲和策六龍。弭節越崦嵫。盛年俛仰過。忽若振輕絲。

樂府詩集有晉四廂樂歌三十一首 晉冬至初歲小會歌一首 晉宴會歌一首  
首皆雜言 晉正德大豫舞歌二首四言 古詩紀有勵志詩九章 祖道征西

應詔一首 祖道趙王應詔一首 太康六年三月三日後園會四章皆四言以皆非五言古故未鈔 又有遊仙詩三首 贈擊仲治一首 疑有關文亦未鈔

陸士衡五古六十六首 文選錄者以○識之樂 府詩集錄者以△識之

△日出東南隅行 相和歌辭○或曰羅敷豔歌

扶桑升朝暉照此高臺端高臺多妖麗濬房出清顏淑貌耀皎日惠心清且閑美目

揚玉澤蛾眉象翠翰鮮膚一何潤秀色若可餐窈窕多容儀婉媚巧笑言暮春春服

成粲粲綺與紈金雀垂藻翹玉佩結瑤璠方駕揚清塵濯足洛水瀾藹藹風雲會佳

人一何繁南崖充羅幕北渚盈軒軒清川含藻景高岸被華丹馥馥芳袖揮泠泠纖

指彈悲歌吐清響雅舞播幽蘭 宋玉風賦臣援琴而鼓之為幽蘭白雪之曲 丹脣含九秋 承上歌南都賦

怨西荆之折盤 妍迹陵七盤 承上舞張衡舞賦歷七盤而履躡 赴曲迅驚鴻蹈節如集鸞 二句歌兼舞 綺態隨顏

變沈姿無定 一作乏 源俯仰紛阿那顧步咸可懽 四句專言舞 遺芳結飛颺浮景映清湍冶

容不足詠春遊良可歎

△挽歌 相和歌辭

卜擇考休貞嘉命咸在茲夙駕驚徒御結轡頓重基龍幌被廣柳 禮記飾棺君龍帷三池振容滿荒鄭

玄曰荒蒙也在旁曰帷在上曰荒皆所以衣柳然龍荒畫龍於荒也釋名輿棺之車其蓋曰柳 前驅矯輕旗殯宮何嘈嘈哀響沸中

闈中闈且勿謹聽我薤露詩崔豹古今注薤露蒿里並喪歌出田橫門人死生各異倫祖載當有時舍爵

兩楹位啟殯進靈輜儀禮遷於祖用輜正柩于兩楹間奠設如初說文輜喪車也飲餞觴莫舉出宿歸無期帷柩

曠遺影棟宇與子辭周親咸奔奏友朋自遠來翼翼飛輕軒駸駸策素騏案轡遵長

薄送子長夜臺呼子子不聞泣子子不知歎息重襯側念我疇昔時三秋猶足收萬

世安可思殉沒身易亡救子非所能含言言哽咽揮涕涕流離。

△○其二

重阜何崔嵬玄廬竄其間磅礴立四極穹隆放蒼天側聽陰溝湧臥觀天井懸墳臣五

作廣宵何寥廓大暮安可晨人往有返歲我行無歸年昔居四民宅今託萬鬼鄰昔為

七尺軀今成灰與塵金玉素所佩鴻毛今不振豐肌饗螻蟻妍姿永夷泯壽堂延魑

魅虛無自相賓螻蟻爾何怨魑魅我何親拊心痛荼毒永歎莫為陳。

△○其三

流離親友思惆悵神不泰素驂伫轎軒玄駟驚飛蓋哀鳴與殯宮迴遲悲野外魂輿

寂無響但見冠與帶備物象平生長旌誰為旆悲風微行軌傾雲結流靄振策指靈

邱駕言從此逝。

△○長歌行相和歌辭○樂府解題古辭云青青園中葵朝露待日晞言芳華不久當努力為樂也

逝矣經天日。悲哉帶地川。寸陰無停晷。尺波豈徒旋。年往迅勁矢。時來亮急弦。遠期鮮克及。盈數固希全。容華夙夜零。體澤坐自捐。茲物苟難停。吾壽安得延。俛仰逝將過。倏忽幾何閒。慷慨亦焉訴。天道良自然。但恨功名薄。竹帛無所宣。迨及歲未暮。長歌乘我閑。

△○君子行古君子行曰君子防未然不處嫌疑閒

天道夷且簡。人道險而難。休咎相乘攝。翻覆若波瀾。去疾苦不遠。疑似實生患。近火

固宜熱履冰。豈惡寒。撥蜂滅天道。說苑王國君前母子伯奇後母子伯封後母欲其

蜂除毒置衣領中伯奇往視袖中殺蜂王讓伯拾塵惑孔顏。呂氏春秋孔子厄陳蔡

奇使者就袖中有死蜂白王追之已自投河中逐臣尚何有。棄友焉足歎。福鍾恆有兆。

禍集非無端。天損未易辭。人益猶可歡。朗鑒豈遠假。取之在傾冠。近情苦自信。君子

防未然。

△○從軍行

苦哉遠征人。飄飄五臣窮四遐。南陟五嶺巔。北戍長城阿。深五臣谷邈五臣無底崇。

山鬱蹙峩奮臂攀喬木。振迹涉流沙。隆暑固已慘。涼風嚴且苛。夏條焦鮮藻。寒冰結衝波。胡馬如雲屯。越旗亦星羅。飛鋒無絕影。鳴鏑自相和。朝餐不免胃。夕息常荷戈。苦哉遠征人。撫心悲如何。

○苦寒行 或曰北上行

北遊幽朔城。涼野多險難。五臣作艱俯入窮谷底。仰陟高山盤。凝冰結重礪。積雪被長巒。陰雲興巖側。悲風鳴樹端。不覩白日景。但聞寒鳥喧。猛虎憑林嘯。玄猿臨岸歎。夕宿喬木下。慘愴恆鮮歡。渴飲堅冰漿。飢待零露餐。離思固已久。寤寐莫與言。劇哉行役人。慊慊恆苦寒。

○豫章行 古豫章行曰白楊初生時乃在豫章山

汎舟清川渚。遙望高山陰。川陸殊塗軌。懿親將遠尋。三荆觀同株。古上畱田行日出是上獨西門三荆

同一根生一荆斷接不長兄弟有兩三人小弟塊摧獨貧四鳥悲異林。家語孔子在衛顏回侍側聞哭聲甚哀回曰此非但為死者又為生離子曰何以知樂會良自古。悼別豈獨今。寄世將幾何。日昃無

停陰。前路既已多。後塗隨年侵。促促薄暮景。亶亶鮮克禁。曷為復以茲。曾是懷苦心。遠節嬰物淺。近情能不深。行矣保嘉福。景絕繼以音。

△○長安有狹邪行古辭曰長安有狹邪狹邪不容車適逢兩少年挾轂問君家

伊洛有歧路。歧路交朱輪。輕蓋承華景。騰步躡飛塵。鳴玉豈樸儒。憑軾皆俊民。烈心勵勁秋。麗服鮮芳春。余本倦游客。豪彥多舊親。傾蓋承芳訊。欲鳴當及晨。守一不足矜。歧路良可遵。規行無曠迹。矩步豈逮人。投足緒已爾。四時不必循。將遂殊塗軌。要子同歸津。

△○塘上行歌錄曰塘上行古辭或云甄皇后作或云魏文帝或云武帝歌曰蒲生我塘中葉何一離離

江籬生幽渚。微芳不足宣。被蒙風雲會。移居華池邊。發藻玉臺下。垂影滄浪泉。霑潤既已渥。結根與且堅。四節逝不處。繁華難久鮮。淑氣與時殞。餘芳隨風捐。天道有遷易。人理無常全。男權智傾愚。女愛衰避妍。不惜微軀退。恆懼蒼蠅前。願君廣末光照。妾薄暮年。

△折楊柳古今樂錄曰王僧虔技錄云折楊柳行歌文帝西山古賦然二篇今不歌

邈矣垂天景。壯哉奮地雷。豐隆豈久響。華光但西曠。日落似有竟。時逝恆若催。仰悲朗月運。坐觀旋蓋迴。盛門無再入。衰房莫苦開。人生固已短。出處鮮為諧。慷慨惟昔人。興此千載懷。升龍悲絕處。葛藟變條枚。寤寐豈虛歎。曾是感與摧。弭意無

足歡願言有餘哀。

○飲馬長城窟行

古辭曰青青河畔草綿綿思遠道

驅馬陟陰山。山高馬不前往。問陰山候。勁虜在燕然。戎車無停軌。旌旆屢徂遷。仰憑積雪巖。俯涉堅冰川。冬來秋未反。去家邈以懸。儉狃亮未夷。征人豈徒旋。末德爭先鳴。凶器無兩全。師克薄賞行。軍沒微軀捐。將遵甘陳迹。收功單于旃。

西域與副校尉陳湯共誅郅支單于

振旅勞歸士。受爵豪街傳。

漢書陳湯上疏曰斬郅支單于首及名王以下宜懸首豪街蠻夷邸間

○門有車馬客行

樂府解題曹植等門有車馬客行皆言問訊其客或得故舊鄉里或述市朝遷謝也

門有車馬客。駕言發故鄉。念君久不歸。濡跡涉江湘。投袂赴門塗。攬衣不及裳。拊膺攜客泣。掩淚敘溫涼。借問邦族閒。惻愴論存亡。親友多零落。舊齒皆彫喪。市朝忽遷易。城闕或邱荒。墳壟日月多。松柏鬱芒芒。天道信崇替。人生安得長。慷慨惟平生。俛仰獨悲傷。

△權歌行

樂府解題魏明帝辭云王者布大化配乾稽后祇此則但言乘舟鼓權而已

遲遲暮春日。天氣柔且嘉。元吉隆初巳。濯穢遊黃河。龍舟浮鷁首。羽旗垂藻葩。乘風宣飛景。逍遙戲中波。名謳激清唱。榜人縱棹歌。投綸沈洪川。飛繳入紫霞。

△泰山吟

樂府解題泰山吟言人死精魄歸於泰山亦薤露蒿里之類也

泰山一何高。迢迢造天庭。峻極周已遠。曾雲鬱冥冥。梁甫亦有館。蒿里亦有亭。幽塗延萬鬼。神房集百靈。長吟泰山側。慷慨激楚聲。

△梁甫吟

琴操曰曾子耕泰山之下天雨雪凍旬月不得歸思其父母作梁山歌

玉衡既已驂。羲和若飛凌。四運循環轉。寒暑自相承。冉冉年時暮。迢迢天路徵。招搖東北指。大火西南昇。悲風無絕響。玄雲互相仍。豐冰憑川結。零一作寒露彌天凝。年命時相逝。慶雲鮮克乘。履信多愆期。思順焉足憑。慷慨臨川響。非此孰為興。哀吟梁甫巔。慷慨獨拊膺。

婕妤怨

樂府解題婕妤好怨為漢成帝班婕妤好作也

婕妤去辭寵。淹留終不見。寄情在玉階。託意惟團扇。春苔暗階除。秋草蕪高殿。黃昏

一作昏黃履綦絕。愁來空雨面。

駕言出北闕行

駕言出北闕。躑躅遵山陵。長松何鬱鬱。邱墓互相承。念昔徂歿子。悠悠不可勝。安寢重冥廬。天壤莫能興。人生何所促。忽如朝露凝。辛苦百年閒。戚戚如履冰。仁智亦何

補遷化有明徵求仙鮮克仙太虛不可凌良會罄美服對酒宴同聲。

○君子有所思行

命駕登北山延伫望城郭塵里一何盛街巷紛漠漠甲第崇高闕洞房結阿閣曲池何湛湛清川帶華薄遂宇列綺窗蘭室接羅幕淑貌色斯升哀音承顏作人生誠行邁容華隨年落善哉膏粱士營生奧且博宴安消靈根鳩毒不可恪無以肉食資取笑葵與藿

說文晉東郭氏上書於獻公公曰肉食者已慮之矣對日忽使肉食失計於廟堂藿食甯得不肝腦塗地也

○悲哉行

歌錄曰悲哉行魏明帝造

游客芳春林春芳傷客心和風飛清響鮮雲垂薄陰蕙草饒淑氣時鳥多好音翩翩鳴鳩羽啾啾倉庚音五臣作吟幽蘭盈通谷長秀被高岑女蘿亦有託蔓葛亦有尋傷哉客遊士憂思一何深目感隨氣草耳悲詠時禽寤寐多遠念緬然若飛沈願託歸風響寄言遺所欽

○齊謳行

漢書禮樂志齊謳員六人

營邱負海曲沃野爽且平洪川控河濟崇山入高冥東被姑尤側南界聊攝城海物錯萬類陸產尚千名孟諸吞楚夢百二侔秦京惟師恢東表詩惟師尚父桓后定周

傾齊桓公也天道有迭代人道無久盈鄙哉牛山歎未及至人情晏子春秋齊景公遊牛首山北臨其國流涕曰若何去此左傳齊侯飲酒樂公曰古而無死其樂若何晏爽鳩苟已徂吾子安得停子對曰古而無死古之樂也爽鳩氏始居此地古若無死爽鳩氏始居此地行行將復去長存非所營之樂非君所願也

△○吳趨行崔豹古今注吳趨行吳人以歌其地也

楚妃且勿歎齊娥且勿謳四坐竝清聽聽我歌吳趨吳趨自有始請從閭門起閭門何峩峩飛閣跨通波重欒承游極回軒啟曲阿藹藹慶雲被泠泠祥風過山澤多藏育土風清且嘉泰伯導仁風仲雍揚其波穆穆延陵子灼灼光諸華王迹隕陽九帝功興四遐大皇自富春矯手頓世羅邦彥應運興粲若春林葩屬城咸有土吳邑最為多八族未足侈四姓實名家張勃吳錄曰八族陳桓呂竇公孫司馬徐傅也四姓朱張顧陸也文德熙淳懿武功侔山河禮讓何濟濟流化自滂沱淑美難窮紀商摧為此歌

其二

繭滿葢重簾惟有遠相思藕葉清朝釧何見早還時

△○前緩聲歌

游仙聚靈族高會曾城阿長風萬里舉慶雲鬱嵯峨宓妃興洛浦楚辭迎宓妃於伊洛王韓起

太華。王謂王子晉韓謂韓眾也皆仙人魏文帝詩王韓獨何人翱翔隨天塗北徵瑤臺女南要湘川娥肅肅宵駕動翩

翩翠蓋羅羽旗棲瓊鸞玉衡吐鳴和太容揮高絃洪崖發清歌思玄賦太容吟日念哉注曰太容黃帝樂

師西京賦洪崖立而指麾辭綜曰三皇時伎人也獻酬既已周輕舉乘紫霞總轡扶桑枝濯足暘谷波清輝

溢天門垂慶惠皇家。

飲酒樂

飲酒須飲多。人生能幾何。百年須受樂。莫厭管絃歌。

○猛虎行古猛虎行曰飢不從猛虎食暮不從野雀棲野雀安無巢遊子為誰驕

渴不飲盜泉水。熱不息惡木陰。惡木豈無枝。志士多苦心。整駕肅時命。策杖將遠尋。

飢食猛虎窟。寒棲野雀林。日歸功未建。時往歲載陰。崇雲臨岸駭。鳴條隨風吟。靜言

幽谷底。長嘯高山岑。急絃無懦響。亮節難為音。人生誠未易。曷云開此衿。眷我耿介

懷。俯仰愧古今。

贈馮文罽

昔與二三子。游息承華南。拊翼同枝條。翻飛各異尋。苟無凌風翮。徘徊守故林。慷慨

誰為感。願言懷所欽。發軔清洛汭。驅馬大河陰。伫立望朔塗。悠悠迴且深。分索古所

悲志士多苦心。悲情臨川結。苦言隨風吟。愧無雜佩贈。良訊代兼金。夫子茂遠猷。款誠寄惠音。

○於承明作與士龍

集云與士龍於承明亭作

牽世嬰時網。駕言遠徂征。飲餞豈異族。親戚弟與兄。婉變居人思。紆鬱遊子情。明發遺安寐。晤言涕交纓。分途長林側。揮袂萬始亭。伫眄要遐景。傾耳玩餘聲。南歸憩永安。北邁頓承明。永安有昨軌。承明子棄予。俯仰悲林薄。慷慨含辛楚。懷往歡絕端。悼來憂成緒。感別慘舒翮。思歸樂遵渚。

○贈弟士龍

行矣怨路長。怒焉傷別促。指途悲有餘。臨觴歡不足。我若西流水。子爲東峙岳。慷慨逝言感。徘徊居情育。逝機自謂也。居謂雲也。言慷慨不平。逝者之言多感。徘徊興戀居者之志。彌生安得攜手俱。契闊成駢服。

△贈尚書郎顧彥先

顧榮字彥先

大火貞朱光。積陽熙自南。望舒離金虎。屏翳吐重陰。淒風迕時序。苦雨遂成霖。朝遊忘輕羽。夕息憶重衾。感物百憂生。纏綿自相尋。與子隔蕭牆。蕭牆阻且深。形影曠不

接所託聲與音。音聲日夜關。何用慰吾心。

其二

朝遊遊層城。夕息旋直廬。迅雷中宵激。驚電光夜舒。玄雲拖朱閣。振風薄綺疏。豐注溢修靈。潢潦浸階除。停陰結不解。通衢化為渠。沈稼湮梁穎。流民沂荆徐。眷言懷桑梓。無乃將為魚。

贈顧交趾公貞

交州刺史顧祕字公貞

顧侯體明德。清風肅已邁。發迹翼藩后。改授撫南裔。伐鼓五嶺表。揚旌萬里外。遠績不辭小。立德不在大。高山安足凌。巨海猶縈帶。惆悵瞻飛駕。引領望歸旆。

答張士然

孫盛晉陽秋張俊字士然少以文章與陸機友善

潔身躋祕閣。祕閣峻且玄。終朝理文案。薄暮不遑眠。善作駕言巡明祀。致敬在祈年。逍遙春王圃。五臣作圃躑躅千畝田。迴渠繞曲陌。通波扶直阡。嘉穀垂重穎。芳樹發華顛。余固水鄉士。總轡臨清淵。戚戚多遠念。行行遂成篇。

贈從兄車騎

陸士光

孤獸思故藪。離鳥悲舊林。翩翩遊宦子。辛苦誰為心。髣髴谷水陽。婉戀崑山陰。吳地記海

鹽縣東北二百里。有長谷。昔陸遜陸凱居此。谷東二十里有崑山。父祖葬焉。營魄懷茲土。精爽若飛沈。寤寐靡安豫。願言

思所欽。感彼歸途艱。使我怨慕深。安得忘憂草。言樹背與襟。斯言豈虛作。思鳥有悲音。

○為顏彥先贈婦集云為全彥先作。今云顧彥先。誤也。且此上篇贈婦。下篇答而俱云贈婦。又誤也。

辭家遠行游。悠悠三千里。京洛多風塵。素衣化為緇。修身悼憂苦。感念同懷子。隆思亂心曲。沈歡滯不起。歡沈難克興。心亂誰為理。願假歸鴻翼。翻飛游江汜。

○其二

東南有思婦。長歎充幽闥。借問歎何為。佳人眇天末。游宦久不歸。山川倚且闊。形影

參商乖。音息曠不達。離合非有常。譬彼絃與括。劉熙釋名。矢末曰括。括會也。與弦會。願保金石軀。慰妾

長飢渴。

為陸思遠婦作

二合兆嘉偶。女子禮有行。潔己入德門。終遠母與兄。如何耽時寵。游宦忘歸甯。雖為

三載婦。顧景媿虛名。歲暮饒悲風。洞房涼且清。拊枕循薄質。非君誰見榮。離君多悲

心。寤寐勞人情。敢忘桃李陌。側想瑤與瓊。

爲周夫人贈車騎

碎碎織細練。爲君作縵繡。君行豈有顧。憶君是妾夫。昔者得君書。聞君在高平。今時得君書。聞君在京城。京城華麗所。璀璨多異人。男兒多遠志。豈知妾念君。昔者與君別。歲律薄將暮。日月一何速。素秋墜湛露。湛露何冉冉。思君歲隨晚。對食不能飡。臨觴不能飯。

祖道畢雍孫劉邊仲潘正叔

皇儲延髦俊。多士出幽遐。適值一作遂時來運。與子遊承華。執笏崇賢內。振纓層城阿。

畢劉贊文武。潘生泣邦家。感別懷遠人。願言歎以嗟。

○赴洛集云此篇赴太子洗馬時下篇云東宮作而此同云赴洛誤也

希世無高符。營道無烈心。靖端肅有命。國語祁午見范宣子曰若能靖端諸侯使服聽命於晉國易大君有命假楫越

江潭。親友贈子邁。揮淚廣川陰。撫膺解攜手。永歎結遺音。無迹有所匿。寂寞聲必沈。

肆目眇不及。緬然若雙潛。南望泣玄渚。北邁涉長林。谷風拂脩薄。油雲翳高岑。疊疊

孤獸騁。嚶嚶思鳥吟。感物戀堂室。離思一何深。伫立慨我歎。寤寐涕盈衿。惜無懷歸

志。辛苦誰爲心。

其二

羈旅遠遊官託身承華側

謂為太子洗馬也洛陽記太子宮有承華門

撫劍遵銅輦振纓盡祇肅歲月一

何易寒暑忽已革載離多悲心感物情悽惻慷慨遺安豫

五臣作念

永歎廢餐食思樂樂

誰誘曰歸歸未克憂苦欲何為纏綿胸與臆仰瞻凌霄鳥羨爾歸飛翼

赴洛道中作

摠轡登長路嗚咽辭密親借問子何之世網嬰我身永歎遵北渚遺思結南津行行遂已遠野途曠無人山澤紛紛餘林薄杳阡眠虎嘯深谷底雞鳴高樹巔哀風中夜流孤獸更我前悲情觸物感沈思鬱纏綿伫立望故鄉顧影悽自憐

其二

遠遊越山川山川脩且廣振策陟崇邱安轡遵平莽夕息抱影寐朝徂銜思往頓轡倚高巖側聽悲風響清露墜素輝明月一何朗撫枕不能寐振衣獨長想

吳王郎中時從梁陳作

在昔蒙嘉運矯迹入崇賢假翼鳴鳳條濯足升龍淵玄冕無醜士冶服使我妍輕劍拂鞶厲五臣作礪長纓麗且鮮誰謂伏事淺契闊踰三年薄言肅後命改服就藩臣夙駕

尋清軌遠遊越梁陳感物多遠念慷慨懷古人

○擬行行重行行

悠悠行邁遠戚戚憂思深此思亦何思思君徽與音音徽日夜離緬邈若飛沈王鮪  
懷河岫定安按東京賦王鮪岫居注山有穴曰岫王鮪魚名居山穴中入河水見日目眩浮水上晨風思北林遊子眇天末還期  
不可尋驚飈褰反信歸雲難寄音佇立想萬里沈憂萃我心攬衣有餘帶循形不盈  
衿去去遺情累安處撫清琴

○擬今日良宴會

閑夜命懽友置酒迎風館齊僮梁甫吟南都賦齊僮唱兮列趙女秦娥張女彈方言秦俗美貌謂之娥哀音  
繞棟宇遺響入雲漢列子韓娥東之齊鬻歌假食既去而餘響繞梁三日不絕又薛談學謳於秦青辭歸青餞於郊撫節悲歌聲振林木響遏行雲  
四座咸同志羽觴不可算高談一何綺蔚若朝霞爛人生無幾何為樂常苦晏譬彼  
伺晨鳥揚聲當及旦曷為恆憂苦守此貧與賤

○擬迢迢牽牛星

昭昭清漢輝粲粲光天步牽牛西北迴織女東南顧華容一何冶揮手如振素怨彼  
河無梁悲此年歲暮跂彼無良緣睨焉不得度引領望大川雙涕如霑露

○擬涉江采芙蓉

上山采瓊蘂。窮谷饒芳蘭。采采不盈掬。悠悠懷所歡。故鄉一何曠。山川阻且難。沈思鍾萬里。躑躅獨吟歎。

○擬青青河畔草

靡靡江籬草。熠熠生河側。皎皎彼姝女。阿那當軒織。粲粲妖容姿。灼灼美顏色。良人遊不歸。偏棲獨隻翼。空房來悲風。中夜起歎息。

○擬明月何皎皎

安寢北堂上。明月入我牖。照之有餘輝。攬之不盈手。涼風繞曲房。寒蟬鳴高柳。踟躕感節物。我行永已久。游宦會無成。離思難常守。

○擬蘭若生朝陽

嘉樹生朝陽。凝霜封其條。執心守時信。歲寒終不彫。美人何其曠。灼灼在雲霄。隆想彌年月。長嘯入飛颺。引領望天末。譬彼向陽翹。

○擬青青陵上柏

冉冉高陵蘋。習習隨風翰。人生當幾時。譬彼濁水瀾。戚戚多滯念。置酒宴所歡。方駕

振飛轡遠遊入長安。名都一何綺。城闕鬱盤桓。飛閣纓虹帶。層臺冒雲冠。高門羅北闕。甲第椒與蘭。俠客控絕景。都人驂玉軒。遨遊放情願。慷慨爲誰歎。

○擬東城一何高

西山何其峻。層曲鬱崔嵬。零露彌天墜。蕙葉憑林衰。寒暑相因襲。時逝忽如頽。三閭結飛轡。離騷飲余馬乎咸池。摠余轡乎扶桑。大臺嗟落暉。易曰昃之離不鼓缶而歌則大臺之嗟凶。曷爲牽世務。中心若有違。京洛多妖麗。玉顏侔瓊蕤。閒夜撫鳴琴。惠音清且悲。長歌赴促節。哀響逐高徽。一唱萬夫歎。再唱梁塵飛。思爲河曲鳥。雙游澧水湄。

○擬西北有高樓

高樓一何峻。迢迢善作茗茗峻而安。綺窗出塵冥。飛陛躡雲端。佳人撫琴瑟。纖手清且閒。芳氣隨風結。哀響馥若蘭。玉容誰能五臣作得顧。傾城在一彈。佇立望日昃。躑躅再三歎。不怨佇立久。但願歌者歡。思駕歸鴻羽。比翼雙飛翰。

○擬庭中有奇樹

歡友蘭時往。迢迢匿音徽。虞淵引絕景。四節逝若飛。芳草久已茂。佳人竟不歸。躑躅遵林渚。惠風入我懷。感物戀所歡。采此欲貽誰。

○擬明月皎夜光

歲暮涼風發。昊天肅明明。招搖西北指。呂氏春秋季秋之月招搖指戌天漢東南傾。夏小正七月漢案戶漢天漢也

案戶直戶也朗月照閒房。蟋蟀吟戶庭。翻翻歸鴈集。嘒嘒寒蟬鳴。疇昔同宴友。翰飛戾高

冥。服美改聲聽。居愉遺舊情。織女無機杼。大梁不架楹。一句言有名無實也大梁昂也

○招隱詩

明發心不爽。振衣聊躑躅。躑躅欲安之。幽人在浚谷。朝采南澗藻。夕息西山足。輕條象雲構。密葉承翠幄。激楚伫蘭林。回芳薄秀木。山溜何泠泠。飛泉漱鳴玉。哀音附靈波。頽響赴層曲。至樂非有假。安事澆淳樸。富貴苟難圖。稅駕從所欲。

○遨遊出西城

遨遊出西城。按轡循都邑。逝物隨節改。時風肅且熠。遷化有常然。盛衰自相襲。靡靡年時改。冉冉老已及。行矣勉良圖。使爾脩名立。

○園葵詩 晉書趙王倫篡帝遷帝金墉城諸王共誅倫齊王冏譖機為倫作禪文賴成都王穎救之免故作此詩以葵為喻謝穎

種葵北園中。葵生鬱萋萋。朝榮東北傾。夕穎西南晞。零露垂鮮澤。朗月耀其輝。時逝柔風戢。歲莫商焱飛。層雲無溫液。嚴霜有凝威。幸蒙高墉德。玄景蔭素蕤。豐條竝春

盛。落葉後秋衰。慶彼晚彫福。忘此孤生悲。

其二

翩翩晚凋葵。孤生寄北藩。被蒙覆露惠。微軀後時殘。庇足周一智。生理各萬端。不若聞道易。但傷知命難。

贈波邱令馮文羆

夙駕出東城。送子臨江曲。密席接同志。羽觴飛鄙淥。登樓望峻陂。時逝一何速。

口鄉亭

東遊觀鞏洛。逍遙邱墓間。秋草漫長柯。寒水入雲煙。發軔有夙宴。息駕無愚賢。

春詠

節運同可悲。莫若春氣甚。和風未及燠。遺涼清且凜。

詠老

軟顏收紅藥。玄鬢吐素華。冉冉逝將老。咄咄柰老何。

秋詠

肅肅素秋節。湛湛濃露凝。太陽夙夜降。少陰忽已升。

本集有東武吟行一首 贈顧彥先一首 疑贈紀士一首 贈潘正叔一首 招  
隱二首 三月三日一首 失題二首 疑有關文未鈔 又短歌行一首 秋  
胡行一首 隴西行一首 皆四言 董逃行一首 上雷田行一首 飲酒樂一  
首 皆六言 燕歌行一首 七言 鞠歌行一首 順東西門行一首 日重光行  
一首 月重輪行一首 百年歌十首 皆雜言 皇太子宴玄圃宣猷堂有令賦  
詩一首 皇太子賜讌詩一首 贈馮文罷遷斥邱令八章 答賈謐十一章  
贈弟士龍十章 贈潘尼一首 答潘尼一首  
講漢書詩一首 皆四言 以皆非五言古故未鈔

○詠史

左太冲五古十二首 以○選錄者 識之  
弱冠弄柔翰。卓犖觀羣書。著論准過秦。作賦擬子虛。邊城苦鳴鏑。羽檄飛京都。雖非  
甲冑士。疇昔覽穰苴。史記司馬穰苴齊景公以為將軍其後齊威王長嘯激清風。志  
若無東吳。鉛刀貴一割。夢想騁良圖。左眄澄江湘。右盼定羌胡。功成不受爵。長揖歸  
田廬。

○其二

鬱鬱澗底松。離離山上苗。以彼徑寸莖。蔭此百尺條。世胄躡高位。英俊沈下僚。地勢  
使之然。由來非一朝。金張藉舊業。七葉珥漢貂。金日磾張湯也馮公豈不偉。白首不見招。漢書

馮唐為郎署長文帝輦  
過問曰父老何自為郎

○其三

吾希段干木。偃息藩魏君。幽通賦干木吾慕魯仲連。談笑卻秦軍。史記白起圍趙魏使新垣衍說趙尊

秦昭王為帝魯連謂平原君曰請為君責而歸當世貴不羈。遭難能解紛。功成恥作

之乃見新垣衍起謝秦聞之為卻五十里不受賞。高節卓不羣。史記秦軍引去平原君欲封魯連魯連曰所臨組不肯緹對珪

甯肯分連璽。耀前庭。比之猶浮雲。

○其四

濟濟京城內。赫赫王侯居。冠蓋蔭四術。朱輪竟長衢。朝集金張館。暮宿許史廬。漢書蓋寬

饒曰上無許史之屬下無金張之託南鄰擊鐘磬。北里吹笙竽。寂寂楊子宅。門無卿相輿。寥寥空宇中。

一作所講在玄虛。漢書揚雄傳雄家貧嗜酒人希言論準宣尼。辭賦擬相如。漢書時

雄雄常用法應之象論語號曰法言先是蜀人悠悠百世後。英名擅八區。

○其五

皓天舒白日。靈景耀神州。列宅紫宮裏。飛宇若雲浮。峨峨高門內。藹藹皆王侯。自非

攀龍客。何為歛來游。被褐出閭闔。晉宮闕名洛陽高步追許由。振衣千仞岡。濯足萬

里流。

其六

荆軻飲燕市。酒酣氣益震。哀歌和漸離。謂若傍無人。

史記荆軻之燕與屠狗及高漸離飲漸離擊筑荆軻歌而和於

市中相樂也已而

雖無壯士節。與世亦殊倫。高眇邈四海。豪右何足陳。貴者雖自貴。

視之若埃塵。賤者雖自賤。重之若千鈞。

其七

主父宦不達。骨肉還相薄。

史記或說主父偃曰太橫偃曰臣結髮游學四十年身不得遂父不以爲子昆弟不收

買臣困樵採。

善作採樵 伉儷不安宅。

漢書朱買臣擔束薪行且誦書妻數止買臣愈疾歌妻羞之求去買臣笑曰我年五十當富貴妻怒曰如公等終餓死溝中耳 陳

平無產業。歸來翳負郭。

漢書陳平家貧好讀書負郭窮巷以席爲門然門外多長者車轍

長卿還成都。壁立何寥廓。

史記卓文君奔司馬相如相與馳歸成都徒四壁立

四賢豈不偉。遺烈光篇籍。當其未遇時。憂在填溝壑。英雄

有述邇。由來自古昔。何世無奇才。遺之在草澤。

其八

習習籠中鳥。舉翮觸四隅。落落窮巷士。抱影守空廬。出門無通路。枳棘塞中塗。計策

棄不收。塊若枯池魚。外望無寸祿。內顧無斗儲。親戚還相蔑。朋友日夜疏。蘇秦北游

史記蘇秦西至秦弗用乃東之趙遂說六國爲從約

李斯西上書。

史記李斯西入秦說秦王王以

爲客卿始皇以斯爲丞相二世下斯吏就五刑 俛仰生榮華。咄嗟復彫枯。飲河期滿腹。貴足不願餘。巢林棲一枝。可爲達士模。

○招隱

杖策招隱士。荒塗橫古今。巖穴無結構。邱中有鳴琴。白雲一作雪停陰岡。丹葩曜陽林。石泉漱瓊瑤。纖鱗或善作亦浮沈非必絲。與竹山水有清音。何事待嘯歌。灌木自悲吟。秋菊兼餼糧。幽蘭間重襟。躊躇足力煩。聊欲投吾簪。

○其二

經始東山廬。果下自成榛。前有寒泉井。聊可瑩心神。峭蒨青蔥間。竹柏得其真。弱葉棲霜雪。飛榮流餘津。爵服無常玩。好惡有屈伸。結綬生纏牽。彈冠去埃塵。惠連非吾屈。首陽非吾仁。相與觀所尚。逍遙撰五臣作極良辰。

○雜詩

秋風何冽冽。五臣作烈烈白露爲朝霜。柔條旦夕勁。綠葉日夜黃。明月出雲崖。皛皛流素光。披軒臨前庭。嗷嗷晨鴈翔。高志局四海。塊然守空堂。壯齒不恆居。歲暮常慨慷。

嬌女詩

吾家有嬌女。皎皎頗白皙。小字爲織一作素口齒自清歷。鬢髮覆廣額。雙耳似連璧。

明朝弄梳臺。黛眉類掃跡。濃朱衍丹脣。黃吻瀾漫赤。嬌語若連瑣。忿速乃明憤。握筆

利彤管。篆刻未期益。執書愛綈素。誦習矜所獲。其姊玉臺作姊字惠芳。兩目燦如畫。輕粧

喜樓邊。臨鏡忘紡績。舉觶擬京兆。立的成復易。玩弄眉頰閒。劇兼機杼役。從容好趙

舞。延袖像飛翮。上下絃柱際。文史輒卷襞。顧盼屏風畫。如見已指擿。丹青日塵闇。明

義爲隱蹟。馳驚翔園林。果下皆生摘。紅葩掇紫蒂。萍實驟抵擲。貪華風雨中。倏忽數

百適。務躡霜雪戲。重綦常累積。并心注肴饌。端坐理盤榻。翰墨戢閑按。相與數離逃。

動爲鑪鉦屈。屣履任之適。止爲茶菽據。吹噓對鼎鑊。外編作鑊脂膩漫白袖。煙薰染阿錫。

衣被皆重池。重池被之心如池也。玉臺作衣破皆重施誤。難與沈水碧。任其孺子意。羞受長者責。警聞當

與杖掩淚俱向壁。

古詩紀有贈妹九嬪悼離詩一首四言以非五言古故未鈔

張景陽五古十二首文選錄者以識之

○詠史

昔在西京時。朝野多歡娛。藹藹東都門。羣公祖二疏。朱軒曜金城。供帳臨長衢。達人

知止足遺榮忽如無。抽簪解朝衣散髮歸海隅。行人爲隕涕賢哉此大選作夫揮金

樂當年歲暮不畱儲。顧謂四座賓多財爲累愚。清風激萬代名與天壤俱。咄此蟬冕

客君紳宜見書。漢書疏廣爲太子太傅兄子受爲太子家令上疏乞骸骨許之賜黃金二十斤公卿大夫設祖道東都門外廣既歸日設酒食賓客相娛

樂或勸買田宅廣曰吾豈老詩不念子孫哉賢而多財則損其志愚而多財則益其過金者聖主所以惠養老臣也

○雜詩

秋夜涼風起。清氣蕩暄濁。蜻蛉吟階下。飛蛾拂明燭。君子從遠役。佳人守瑩獨。離居幾何時。鑽燧忽改木。房櫳無行跡。庭草萋以綠。青苔依空牆。蜘蛛網四屋。感物多所懷。沈憂結心曲。

○其二

大火流坤維。白日馳西陸。浮陽映翠林。迴飈扇綠竹。飛雨灑朝蘭。輕露棲叢菊。龍蟄暄氣凝。天高萬物肅。弱條不重結。芳蕤豈再馥。人生瀛海內。忽如鳥過目。川上之歎逝。前修以自勗。

○其三

金風扇素節。丹霞啟陰期。騰雲似湧煙。密雨如散絲。寒花發黃采。五臣作彩秋草含綠滋。

閒居玩萬物。離羣戀五臣所思。案無蕭氏牘。庭無貢公基。漢書蕭育與朱博為友時人為之語曰蕭朱結綬王

貢彈冠謂王陽貢公也。高尙遺王侯。道積自成基。至人不嬰物。餘風足染時。

○其四

朝霞迎白日。丹氣臨暘善作谷。翳翳結繁雲。森森散雨足。輕風摧勁草。凝霜竦高木。

密葉日夜疏。叢林森如束。疇昔歎時遲。晚節悲年促。歲暮懷百憂。將從季主卜。史記

季主者楚人也卜於長安東市宋忠與賈誼遊於市中謁司馬季主講卜

○其五

昔我資章甫。聊以適諸越。行入幽荒。歐五臣駱從祝髮。莊子宋人資章甫而適諸越越人敦髮文身無所用

之敦猶斷也。窮年非所用。此貨將安設。瓠瓠夸璵璠。魚目笑明月。不見郢中歌。能否居然

別。陽春無和者。巴人皆下節。流俗多昏迷。此理誰能察。

○其六

朝登魯陽關。狹路峭且深。庾仲雍荊州記其北有四關魯陽伊關之屬也。流澗萬餘丈。圍木數千尋。咆虎響

窮山。鳴鶴聒空林。淒風為我嘯。百籟坐自吟。感物多思情。在險易常心。揭來戒不虞。

挺轡越飛岑。王陽驅九折。漢書王陽為益州刺史行部至邛樊九折坂嘆曰奉先人遺體柰何數乘此險以病去及王遵為刺史至坂叱

其馭曰驅之然此言王陽周文走岑釜必殺之廡巖是文王之所避風雨者也何休  
驅九折蓋驅馬而去之也必殺之廡巖是文王之所避風雨者也何休  
曰其處阻險故文王過經阻貴勿遲此理著來今

○其七

此鄉非吾地此郭非吾城羈旅無定心翩翩如懸旌出覩軍馬陣入聞鞞鼓聲常懼  
羽檄飛神武一朝征長鋏鳴鞘中烽火列邊亭捨我衡門衣更被縵胡纓疇昔懷微

志帷幕竊所經何必操干戈堂上有奇兵呂氏春秋士尹陶為荆使於宋司城子罕

注於庭下而不止問其故子罕曰南家鞞工也三葉矣今徒求鞞者不知處將不食

西家高吾宮卑潦注吾宮不禁也荆適攻宋遂止孔子聞之曰夫修之廟堂之上折

衝千里之外其司折衝樽俎間制勝在兩楹晏子春秋晉平公使范昭觀齊政景公

去昭起舞謂太師曰為我奏成周之樂太師曰盲臣不習也范昭歸謂

平公曰齊未可并孔子曰不出樽俎之間折衝千里之外晏子之謂也

拙速乃垂名拙速不睹工久

○其八

述職投邊城羈束戎旅閒下車如昨日望舒四五圓借問此何時胡蝶飛南園流波  
戀舊浦行雲思故山閩越衣文蚰胡馬願度燕風土安所習由來有固然

○其九

三十家詩鈔 卷一 晉 張協 四十六

結宇窮岡曲。耦耕幽藪陰。荒庭寂以閒。幽山一作岫峭且深。淒風起東谷。有澗興南岑。

詩有澗萋萋興雨祁雖無箕畢期。膚寸自成霖。澤雉登壟雉。寒猿擁條吟。溪壑無人

跡。荒楚鬱蕭森。投耒循岸垂。時聞樵採音。重基可擬志。迴淵可比心。養真尚無為。道

勝貴陸沈。莊子孔子之楚舍於蟻邱之漿其鄰有夫妻臣妾登游思竹素園。寄辭翰

墨林。

○其十

黑蜨躍重淵。淮南子犧牛駢毛宜於廟牲其於商羊儻野庭。家語齊有一足鳥飛集

此名商羊水祥也飛廉應南箕。豐隆迎號屏。雲根臨八極。雨足灑四溟。霖瀝過二旬。

散漫亞九齡。階下伏泉湧。堂上水衣生。洪潦浩方割。人懷昏墊情。沈液漱陳根。綠葉

腐秋莖。里無曲突煙。路無行輪聲。環堵自頽毀。垣閭不隱形。尺燼重尋桂。紅粒貴瑤

瓊。君子守固窮。在約不爽貞。雖榮田方贈。慙為溝壑名。說苑子思居衛緼袍無裏田

謂曰吾假人遂忘之吾與人如弃之子思辭曰彼聞取志於陵子。孟子陳仲子居比

足。五臣作之黔婁生。列女傳黔婁先生死曾子吊之曰何以爲謚妻曰以康爲謚先

雜詩

太昊啟東節。春郊禮青祇。鷹化日夜分。雷動寒暑離。飛澤洗冬條。浮颺解春澌。采虹  
纓高雲。文虬鳴陰池。冲氣扇九垓。蒼生衍四垂。時至萬寶成。化周天地移。

古詩紀有遊仙一首  
疑有關文故未鈔

劉越石五古三首

文選錄者以○識之樂  
府詩集錄者以△識之

○重贈盧湛

握中有玄璧。本自荆山璆。惟彼太公望。昔在渭濱叟。鄧生何感激。千里來相求。東觀漢記

更始以世祖為大司馬使安集河北鄧禹聞之自南陽追至鄴謁上見之甚驩白登幸曲逆音句鴻門賴留侯音頓圍高帝

平奇計解圍過曲逆因封平為曲逆侯項王宴高帝於鴻門留張良為謝因得免重耳任五賢左傳晉公子重耳之及於難也遂奔狄從者狐偃趙衰顛

頡魏武子小白相射鉤乾侯之役管仲射桓公中鉤苟能隆二伯安問黨與讐中夜撫枕歎相與

數子游吾衰久矣夫何其不夢周誰云聖達節知命故不憂宣尼悲獲麟西狩涕孔

邱功業未及見夕陽忽西流時哉不我與去乎若雲浮朱實隕勁風繁英落素秋狹

路傾華一作蓋駭駟摧雙輓何意百鍊剛化為繞指柔音書曰琨詩託意非常摠暢幽憤遠想張陳感鴻門白登

之事用以激譏素無奇略以常詞酬和殊乖琨心

○扶風歌集云扶風歌九首蓋以兩韻為一首今此合之疑誤

朝發廣莫門。暮宿丹水山。晉宮闕名洛陽城廣莫門北向漢書高都莞谷丹水所出也左手彎繁弱。右手揮龍淵。

繁弱大弓也龍淵劍也顧瞻望宮闕。俯仰御飛軒。據鞍長歎息。淚下如流泉。繫馬長松下。發鞍

高岳頭。烈烈悲風起。泠泠澗水流。揮手長相謝。哽咽不能言。浮雲為我結。歸作五臣飛鳥

為我旋。去家日已遠。安知存與亡。慷慨窮林中。抱膝獨摧藏。麋鹿遊我前。猿猴戲我

側。資糧既乏盡。薇蕨安可食。攬轡命徒侶。吟嘯絕巖中。君子道微矣。夫子故一作固有

窮。惟昔李騫期。寄在匈奴庭。李謂李陵也騫與愆通易歸妹愆期遲歸有時忠信反獲罪。漢武不見明。我欲

竟此曲。此曲悲且長。棄置勿重陳。重陳令心傷。樂府每四句一解凡九解

△胡姬年十五。漢辛延年羽林郎日胡姬年十五春日獨當壚。樂府作晉劉琨五言律祖作梁劉琨然晉未有律體律祖或有考也

虹梁照曉日。淥水泛香蓮。如何十五少。含笑酒壚前。花將面自許。人共影相憐。回頭

堪百萬。價重為時年。

古詩紀有答盧諶八章四言以非五言古故未鈔

郭景純五古十首。竝文選所錄以識之

○遊仙詩

京華游俠窟。山林隱遯棲。朱門何足榮。未若託蓬萊。臨源挹清波。陵岡掇丹萸。本草經赤

芝一名丹芝凡靈谿可潛盤安事登雲梯漆園有傲夷史記莊周為漆園吏楚威王使使迎以為相周曰亟去無我萊氏有逸妻列女傳萊子耕蒙山楚王造之其妻曰居亂世為人所制能免於患乎投其畚而去萊子乃隨而隱進則保龍見退為觸藩羝高蹈風塵外長揖謝夷齊。

其二

青溪千餘仞中有一道士荆州記臨沮縣有青溪山郭景純嘗作臨沮縣令雲生梁棟間風出窗戶裏借問

此何誰云是鬼谷子周時有豪士隱於鬼谷翹迹企潁陽臨河思洗耳許由居潁川之陽堯讓天下由其言不善臨

河而洗其耳聞闔西南來聞闔風也潛波渙鱗起靈妃顧我笑粲然啟玉齒蹇修時不存要之

將誰使。

其三

翡翠戲蘭苕容色更相鮮綠蘿結高林蒙籠蓋一山中有冥寂士靜嘯撫清絃放情

凌霄外嚼藥挹飛泉赤松林上游駕鴻乘紫煙列仙傳赤松子神農雨師也常止西王母石室中隨風雨上下左挹

浮邱袖右拍洪崖肩列仙傳浮邱公接王子喬上嵩山西京者借問蜉蝣輩甯知龜鶴

年。

其四

三十家詩鈔 卷一 晉 郭璞 四十八

六龍安可頓

楚辭維六龍於扶桑

運流有代謝

時變感人思

已秋復願夏

淮海變微禽吾生獨

不化

國語趙簡子雀入海為蛤雖欲騰丹谿雲螭非我駕愧無魯陽德迴日向三

舍

淮南子魯陽公與韓邁戰酣日暮援戈而揮之日為之反三舍

臨川哀年邁撫心獨悲吒

○其五

逸翮思拂霄迅足羨遠遊清源無增瀾安得運吞舟  
珪璋雖特達明月難闇投潛穎怨清陽陵茗哀素秋悲來惻丹心零淚緣纓流

○其六

雜縣寓魯門風煖將為災

國語海鳥爰居止魯東門外展禽曰今歲海其有災乎

吞舟湧海底高浪駕蓬萊神

仙排雲出但見金銀臺陵陽挹丹酒容成揮玉杯

列仙傳陵陽子明釣魚於澗溪得白魚腸中有書言服食之法子明

採玉石芝服之三年龍來迎去又容成公自稱黃帝師見於周穆王善補導之事

姮娥揚妙音

淮南子羿請不死之藥於西王母姮娥竊而奔月

崖頷其頤升降隨長煙飄颻戲九垓奇齡邁五龍

歲方嬰孩燕昭無靈氣漢武非仙才

燕昭王使人人海求蓬萊瀛洲方丈漢武內傳西王母曰劉徹形慢神穢雖當語之以至道殆

恐非仙才也

○其七

晦朔如循環。月盈已見魄。

孔安國尚書疏。十日。六日。明消而魄生。暮收清西陸。朱羲將由白。

記仲秋之月。其神暮收續。

漢書日行西陸謂之秋。朱羲日也。

寒露拂陵茗。女蘿辭松柏。薜榮也。

朝菌也。

不終朝。蜉蝣豈見夕。圓邱有

奇草。鍾山出靈液。

外國圖圓邱有不死樹。食之乃壽。十洲記鍾山出千歲芝。王孫列八珍。安期鍊五石。

言王孫列八珍以傷。

生安期鍊五石以延壽。優劣殊也。列仙安期生自言千歲抱朴子五石者丹砂雄黃白礬石曾青磁石也。長揖當途人去來。山林客。

○其八

暘谷吐靈曜。扶桑森千丈。朱霞升東山。朝日何晃朗。迴風流曲檣。幽室發逸響。悠然

心永懷。眇爾自遐想。仰思舉雲翼。延首矯玉掌。嘯傲遺世羅。縱情任獨往。明道雖若

昧。其中有妙象。希賢宜勵德。羨魚當結網。

漢書董仲舒傳臨淵羨魚不如退而結網。

○其九

採藥遊名山。將以救年頽。呼吸玉滋液。妙氣盈胸懷。登仙撫龍駟。迅駕乘奔雷。鱗裳

逐電曜。雲蓋隨風迴。手頓羲和轡。

楚辭吾令羲和弭節兮。

足蹈閭闔開。

楚辭吾令帝閭闔開關兮。倚閭闔而望予。

東海猶蹄涔。

淮南子夫牛蹄之涔不能生鱸鮪。

崑崙若蟻堆。遐邈冥茫中。俯視令人哀。

○其十

璇臺冠崑嶺。

離騷望瑤臺之偃蹇。今史記崑崙高二千五百里。其上有醴泉瑤池。

西海濱招搖。

山海經招搖之山臨於西海之上。多桂多

三十家詩卷二  
玉瓊林籠藻映碧樹疏英翹丹泉漂朱沫黑水鼓玄濤尋仙萬餘日今乃見子喬

振髮晞翠霞解褐被絳綃總轡臨少廣莊子西王母得之坐乎少廣注得之謂得道少廣宮名盤虬舞雲韶

晉書樂志情情永偕帝鄉侶千齡共逍遙  
古詩紀有遊仙四首 贈潘尼一首 春詩一首 夏詩一首 別  
詩一首皆疑有關文 又贈温嶠一首 題墓詩一首皆四言故未鈔

其八

湖其中育以樂帝寶宜

心亦與相爾自感慙

關谷出靈嗣并乘森

其八

千嶺

青草

三十家詩鈔卷二

三十家詩鈔卷二



國家圖書館



003676677

